

Ebe onodode ni iPọlu o keke ghi egbo IKoritia Eni e miesuo

Otse oyi iPọlu

¹ Mhemhe iPọlu, aghiusomhi na kee oyi iJesu iKirisiti ni Eshinegba o ze abi o ghole oli shi mhi khi, li shi inyoghuo awa iSositenisi.

² Mhemhe mhi keke ebe ona a ghi igbaa oyi eni e mie iJesu iKirisiti suo onayi Eshinegba ni e la iKoriti, ikhi eni Eshinegba o lu e khi egbo eyoli. Eri o re e khi egbo ni e pfuase rote obo oyi iJesu iKirisiti, abi o li egbo ni e miesuo ashakhasha.*

³ Eshinegba ita awa ali iJesu iKirisiti Onomhue oyawa e ka li okhale na e, e ri opfomhe na e.

IPọlu o ri ikphemhi na Eshinegba

⁴ Eghẹghe kpa mhi ro kphemhi e na Eshinegba oyemhe irari okhale ni o riele na e rote obo oyi iJesu iKirisiti. ⁵ O she re mholi epfue odekhode elemhi iguengme ungmehi ali ilese nya. ⁶ Oni usomhi oyi iKirisiti o she lo e egbe shito egbegbo. ⁷ Irarigho, isomhopfa ayemhe okhoghuo o a ke to e abi a li migha khe ibhale oyi iJesu iKirisiti Onomhue oyawa ni a la roli ya kase. ⁸ O ya mu e mhue gbaa ya ramhi ukpese, ni a khi eni ea mhue umhaguekia, a khi ogbele ni iJesu iKirisiti Onomhue oyawa o ya bhale. ⁹ Eshinegba ni o lu e ni a nu omi oli iJesu

* **1:2** Li ze Ika 18.1

iKirisiti Ọnọmhuẹ ọyawa mhuẹ ugamhi kugbe, ọni a ri egbe ẹ nga ọ khi.

Okemhi ni o la eni e miesuọ iteva

¹⁰ Inyoghuo-mhẹ mhi ri eva oyi iJesu iKirisiti Ọnọmhuẹ oyawa lema ẹ, ẹẹ nya a ke yemhẹ na egbe ini okemhi o khi lo ẹ le, ali ni a mhọli udu oghuo ali usamhi oghuo. ¹¹ Ẹgbọ eghuo na ọmhuẹ-apfẹ oyi iKiloe e gueyẹ mhẹ khi iwola e la ẹ iteva. ¹² Emini mhi ri onana ngme khi, ọgbogbọ ọọ ngme unu ọdọda, ọghuo ọ khẹ, “IPọlu mhia deba,” ọlese ọọ, “Apolosi mhia deba,” ọlese ọọ, “IPita mhia deba,” ọlese ọọ, “iKirisiti mhia deba.”† ¹³ Eri a kemhi iKirisiti? IPọlu a gbe-a shi ọọra apfida na ẹ? Abi khi eva oyi iPọlu a rọ batazi ẹ? Eniyẹ odukhokho eyi iPọlu a khi? ¹⁴ Mhi kphẹmhi na Ẹshinegba khi mhi aa batazi ọngẹ ẹ, sẹ ni iKirisipusi ali iGayusi.‡ ¹⁵ Irarighọ, ọngẹ ẹ ọa ya liẹ khi mhi ri eva oyemhẹ batazi lue. ¹⁶ Mhi leşẹ khi mhi batazi apfẹ iSitefanasi, mhi aa ke sato ini mhi li batazi ọgboşẹ.§ ¹⁷ Irari khi iKirisiti ọa ghie mhẹ mhi ke batazi ẹgbọ, ama mhi ke kia gue ungmehi oyọli le ni ọa rọte ileşẹ oyi ọgbọ bhale. Ini eghuli ni iKirisiti ọ ghu shi apfida o khi mele afue-a.

iKirisiti ni ọ khi ileşẹ ali ekpabọ

¹⁸ Irari khi eri ungmehi oyi apfida o khi afue şhi esọ oyi ẹgbọ ni ẹẹ pfua ọ, ama awa ni a mie ẹ pfuese, ekpabọ oyi Ẹshinegba o khi na awa. ¹⁹ Irari khi Ebe-no-pfuase ọọ li, “Mhi ya pfueche ẹgbhali

† **1:12** Li zẹ Ika 18.24 ‡ **1:14** Li zẹ Ika 18.8; 19.29; iRom 16.23

§ **1:16** Li zẹ 1 iKori 16.15

oyi eni e mholi egbhali-a,
mhi bi ilęsingme oyi

eni e rięle khi wewę e guę ebe ma.”*

²⁰ Mena, ashi ọna ilęsingme ọ migha? Ashi ọguebe ọ la? Ashi eni e guę khako ena agbo namo e migha? Ọa khi eri Eshinęba ọ ri egbhali ni e la agbo ona mele ọyęghę-a?† ²¹ Eri Eshinęba ọ ri ilęsingme oyi lolighuo zę khi egbo ęa rote ilęse oyewę lese ọli. Ochoghọ, eri o ghọle Eshinęba ni ọ rote itsabo oyi usomhi ni egbo ęę khi oyęghę lo, tsumhi eni e mie oni usomhi suo. ²² Egbo iJu, irokhase eyi ọnyalo e migha kę, egbo iGiriki ęę nono ilęsingme, ²³ ama eri anye ri iKirisiti ni a gbe-a tama apfida tse abo usomhi ona, o ri elemhi a bi egbo iJu, o khi oyęghę shi esọ oyi egbo iJeta, ²⁴ ama egbo ni Eshinęba ọ lu, ghe iJu ali iGiriki e me oni usomhi oyi iKirisiti shi khi ekpabo ali ilęse oyi Eshinęba o khi. ²⁵ Irari khi emini o li abi umhalęse oyi Eshinęba, o mhue ilęse dose egbhali oyi ọgbo, emini o li abi ọlosemhe oyi Eshinęba o mhue itoto dose ekpabo oyi ọgbo.

²⁶ Inyoghuo, a sato emini a kpe khi neni Eshinęba ọ lu e. Egbo ena agbo ona ęa bino shi eni e mholi ugbhe, ali khi ọa khi ebubu e e fialo-a, ọa khi ebubu e e khi ekhemhue. ²⁷ Eri Eshinęba ọ zę emini egbo e bino shi emhi eyęghę elemhi agbo ona kę, ọ rewe ri omama mu elęsingme. Ọ zę emini ęę mhue ochi elemhi agbo ona ro khi eni e mhue ekpabo unu-a.

²⁸ Eshinęba ọ zę emini ęa mu eloe na agbo ona ali emini egbo e ri eloe gbe, ni e ro shi afue. Ọ rewe ri emini egbo ęa bino khi e mu eloe mele afue-a,

* **1:19** Li zę Aza 29.14 † **1:20** Li zę iJobu 12.17; Aza 19.12; 33.18; 44.25

²⁹ ini oḡbòkòghuo o khi doḡe la odalo oyi Eshineḡba tonò obò udu. ³⁰ Irari khi loli o ku awa ali iJesu iKirisiti gbe. IKirisiti ni o khi ilẹḡe ni o roḡe obò oyi Eshineḡba bhale. Emini a ri ona ngme khi, loli o khi ipfuase ali iroḡfuase ali ipfasheḡe oyawa. ³¹ Irari ona, Ebe-no-pfuase o roḡ liẹ, “Onini o da nono ni loli tonò obò udu, o ke ri emini Onomhue o riẹḡe tonò obò udu.”‡

2

¹ Inyoḡhuo, abi mhi roḡ bhale olieye e ya tsabo osheli igesikia ni o la ungmehi oyi Eshineḡba, mhi aa lii ngme ingmemhi ena ghogighogi, wekhi eri mhi roḡkhasẹ khi mhii wena gba. ² Irari khi abi mhi roḡ la iteva oyeye, eri mhi rue udu emhikpa-a, mhi ri udu lẹḡe shi ingme oyi iJesu iKirisiti ali eghuli ni o ghu shi apfida. ³ Onana o ze khi abi mhi roḡ te eḡe bhale, eri mhi li abi oni oḡa mhue ochi, ulishi o remhe kpheli.* ⁴ Abi mhi roḡ sese e, ni mhi roḡ tse abo ungmehi gueye e, mhi aa ri ilẹḡedose ali eta-olelemhunu nu e ngme. Ama eri mhi ri ekpabo oyi Ayemhe oyi Eshineḡba khasẹ. ⁵ Ini irudunga ni a mhue, o khi ya migha nga eḡbhali oyi oḡbo, ama ekpabo oyi Eshineḡba.

Ilẹḡingme oyi Eshineḡba

⁶ Usomhi ni o khi oyi ilẹḡingme anye gueye eḡbo ni e womhe eloe shi emhi irudunga. Ama oḡa khi ilẹḡe oyi aḡbo namo wekhi oyi eni ee mhesẹ shi aḡbo namo, eni e ya mele afue-a. ⁷ Ingme osheli ilẹḡingme oyi Eshineḡba mhia ngme. Ilẹḡingme ni o roḡ sheli na eḡbo aḡbo aḡbo ni o she kpe gba shi eḡe

‡ **1:31** Li ze ijere 9.24 * **2:3** Li ze lka 18.9

khi awa ya mḥoli okemhi shi ufumhi oyoli. ⁸ Aa me oghie okhoghuo ighie ena agbo namo ni o lese oni ileasingme ona. Ini o khia khi e lese lo, ea kha ta Onomhue ni o mhue ufumhi ma afida gbe-a. ⁹ Ama abi Ebe-no-pfuase o ngme ni oḡ,
 “Ukpeloe okhoghuo oḡa me ne,
 esḡ okhoghuo oḡa suḡ ne,
 wekhi eri oḡbokhoghuo
 o sa udu oyoli ramhi o ghue,
 emini Eshinegba o rieḡe
 shi eke e khe eni
 e nono ingme oyoli.”†

¹⁰ Ama Eshinegba o she roli khase awa rote Ayemhe oyoli. Irari khi eri Ayemhe oḡo guano emhikpa, ya ramhi osheli ni Eshinegba o gba.

¹¹ Itobo khi Ayemhe ni o la oḡbo egbe lueghuo o lese isamhi eyi oni oḡbo. Igho oḡbokhoghuo oḡa lese isamhi eyi Eshinegba, seḡ ni Ayemhe oyi Eshinegba.

¹² Awa aa mie ayemhe oyi agbo ona, ochoghḡo ayemhe ni o rote obḡ Eshinegba bhale ni awa ro lese emhi nya ni Eshinegba o ro na awa afue-afue, awa mie.

¹³ Anye ea ya ngme ingmemhi ni a rote eḡbhali oyi oḡbo sese, ama ingmemhi Ayemhe oyi Eshinegba o sese anye, anye lie sese eḡbo ni e la elemhi ayemhe, emini e khi emhi ayemhe, ni e khi eḡbegbo. ¹⁴ Oḡbo ni oḡa da mhue oni ayemhe ne, oḡa ya lese emini a ri emhi na Ayemhe oyi Eshinegba ngme. Oḡbo oḡhḡoḡo, afue emhi ayemhe e khi shi oli eloe, irari khi emini e khi ode ayemhe, ayemhe a te e lese we. ¹⁵ Oḡbo ni o da mhue oni ayemhe ne, o doḡe ya lese udi emhikpa, ama eḡboese ea doḡe ya lese

† 2:9 Li ze Aza 64.4

abi oni oḡbọ ọna o la o shi. ¹⁶ Abi Ebe-no-pfuase o ngme, ni ọọ,
 “Oghuo o lese udu
 oyi Onomhue?
 Ni o doḡe ya ye oḡi ude?”
 Ama khi, awa mḡoli udu oyi iKirisiti.‡

3

Okemhi ni o la iteva igbaa oyi eni e mie ifesu iKirisiti suọ na iKoriti

¹ Inyoghuo, mhi aa nu e ya ngme abi eni e mhuẹ Ayemhe oyi Eshineḡba, ama abi eḡbọ ni e ngeli abi eḡbọ na agbọ, ali emofe elemhi irudunga oyi iKirisiti. ² Loli mhi ro ri amẹ inyeli na e da ni ọa khi eminale ni e toto, irari khi aa mu egbe shi eminale ni e toto ne. Ramhi memena aa kie mu egbe ne.*
³ Eḡbọ na agbọ a kie khi. Emini o da ze khi a kiele e kpe ofuma deba egbe ali khi a nu egbe e e wola, ogho o rokhasẹ khi eḡbọ agbọ a kie khi? Ọa khi eri a kiele e ngeli abi eḡbọ na agbọ? ⁴ Ini oṡuoghuo elemhi e ọọ li, “IPolu mhia deba”, ni oḡese o ro o li, Apolosi mhia deba, ọa khi eri a ngeli abi eḡbọ na agbọ egho?†

⁵ Ini eḡe a bino oḡi bie, oghuo Apolosi o fe khi? Oghuo iPolu o khi. Eni eḡe ga eyi Eshineḡba anye ga khi ni eḡe a roṡe obọ oyanye miesuo. Eri oḡbọḡbọ ọọ gbe akanya oyoli ni Onomhue o rona li o gbe. ⁶ Mhemhe mhi ri ukpamhi ko, Apolosi o ku amẹ shi o, ama Eshineḡba o ze ni oni ukpamhi o ro fu.‡ ⁷ Oni o ro ko ali oni o ku amẹ shi o, eḡa mu eloe. Se khi

‡ **2:16** Li ze Aza 40.13 * **3:2** Li ze Iburu 5.12-13 † **3:4** Li ze 1 iKori 1.12 ‡ **3:6** Li ze Ika 18.4-11,24-28

Ẹshinẹgba ni ọ ri emhi ẹ fu. ⁸ Ikhiọda ọa laọ na ọni ọ rọ kọ ali ọni ọ ku amẹ shi ọ, Ẹshinẹgba ọ ya ri elele na ọgbọgbọ abi ọ li gbe. ⁹ Irari khi eri anye kugbe ẹ gbe ikanya na Ẹshinẹgba, ẹẹ a khi ishemhi oyọli.

Owa oyi Ẹshinẹgba a gbo khi. ¹⁰ Rọte afu ni Ẹshinẹgba ọ rọ na mhe, mhi rọ ri irogbekẹ gbe, abi ọga oyi itsona. Onana ẹgboẹese ẹẹ ma a nga. Eri-tse ọgbọgbọ ọ leşe abi ọ li ma a nga ọ. ¹¹ Irari khi ọgbọkhọghuo ọa ke gbo dobe ya ri irogbekẹ olese gbe doşe oni Ẹshinẹgba ọ she rọ gbe ni ọ khili iJesu iKirisiti. ¹² Ini ọgbọkhọghuo ọ tọ nga oni irogbekẹ ona, ni ọ rọ ri igolu tọ nga ọ, okekhi ẹlomho, okekhi ẹche ni ẹ ghale, okekhi ẹera, okekhi ẹfolo, okekhi ifulo ọ rọ tọ nga ọ. ¹³ A ya ri emini e la elemhi emini ọgbọgbọ ọ rọ tọ nga ọ khasẹ gboo, ọgbele iguezo. Erali a rọ ya mhesẹ emini ọ rọ tọ nga bino ni a leşe emini e la elemhi we. ¹⁴ Ini emini ọ rọ tọ nga ọ, o pfue oni erali, a ya ri elele na li. ¹⁵ Ini e toa, opfu o gbe ọli, ama a ya tsumhi ọli. Eri-tse khi eri o ya li abi ọgbọ ni ọ na pfue ẹlemhi erali. ¹⁶ Ẹẹ a leşe khi owa ugamhi oyi Ẹshinẹgba a khi, ali khi Ayemhe oyi Ẹshinẹgba o la ẹ egbe?§ ¹⁷ Ini ọgbọkhọghuo ọ yese Owa ugamhi Oniemhi oyi Ẹshinẹgba-a, Ẹshinẹgba ọ ya yese ọni ọgbọ-a. Irari khi eri Owa ugamhi oyi Ẹshinẹgba, o pfuase, ali khi Owa Ugamhi oniemhi oyọli ẹẹ a khi.

¹⁸ A khi ke di egbe ẹ. Ini ọngẹ ẹ ọ nono ni lọli khi ọni ọ mhọli ilẹsingme shi ẹghẹghẹ ni a la ena, ọ ka khi ọyẹghẹ ni ọ me asha khi ọni ọ khi ọlẹsingme egbegbọ. ¹⁹ Irari khi emini ẹgbọ na agbọ ẹẹ bino shi ilẹsingme, afuẹ Ẹshinẹgba ọ bino ọli shi. Abi ebe

§ 3:16 Li ze 1 iKori 6.19; 2 iKori 6.16

o ngme, ni ọọ, “Eri Ẹshinẹgba ọ ri ilẹsẹdọsẹ eyi eni ẹ liẹ khi wẹwẹ e lẹsingme riẹlẹ wẹ gbo mu.”* ²⁰ Asha olese o gbo ngme ọli shi ebe khi, “Ẹshinẹgba ọ lẹsẹ khi isamhi ni ọni ọ liẹ khi lọli lẹsẹ dọsẹ ọọ sa khi ẹa mu amẹ.”† ²¹ Itobọ ighọ, a khi ke ri ọgbọkhọghuo tonon ọbọ udu, irari khi emhikpa, eyi ẹẹ lọ, ²² o khi iPọlu o, okekhi Apolosi o, okekhi iSẹfasi ni a gbolo a lu iPita o, okekhi agbọ ali eghuli o, okekhi agbọ onana ali ogbenakọ o, ẹẹ a ga mhue wẹ nya. ²³ Ẹẹ oyẹẹ eyi iKirisiti a khi, ọni iKirisiti ọ khi ọyi Ẹshinẹgba.

4

Ighiusomhi na kẹ eyi iKirisiti

¹ A ke sato anye egbe abi eni ẹẹ gbe akanya na iKirisiti ni a ri osheli oyi Ẹshinẹgba nga obọ. ² A zẹ ni a bhale ya ẹ khi ọni a ri emhi nga obọ, ọ ri igesikia deba li. ³ Ẹgboli oyemhẹ ọa laọ ini u gue mhẹ ẹzọ, o ke khi ikọtu na agbọ e gue mhẹ ẹzọ. Mhẹmhẹ mhi aa fẹ gue egbemhẹ ẹzọ. ⁴ Emhikhọghuo ọa nase mhẹ udu ni ọ gue mhẹ ẹzọ, ama oghọ ọa liẹ khi abọ eyemhẹ e ma pfuase gba. Ọnọmhue ọọ gue mhẹ ẹzọ. ⁵ Irarighọ, a khi gue ọgbọkhọghuo ẹzọ ne neni eghẹghẹ iguezo o ramhi. Migha ni Ọnọmhue ọ bhale ne. Ọ ya rue emini a rọ sheli alo ebili lasẹle ali emini e la ọgbọgbọ udu, eghẹghẹ aghọ Ẹshinẹgba ọ ya kuẹghie ọgbọgbọ abi o ti shi.

⁶ Emọle, mhi she ri Apolosi ali egbemhẹ riẹlẹ irokhọkhọ khase ẹ ni a rọ lẹsẹ abi ungmehi onana o ngme ni ọọ li, “A deba oni omhese ni o gbe akanya.” Aa khi ke liẹ khi ọghuo e, ọ ti dọsẹ ọlese.

* **3:19** Li zẹ iJobu 5.13 † **3:20** Li zẹ Iwolo 94.11

⁷ Elo o la e egbe ni o gho re e mu eloe? Elo a mholi ni o a khi eri a roli na e? Ini o khia khi eri a roli na e, elo o ze ni a ro tonon obodu?

⁸ Ee a she ga mhu e emini a nono nya! Ee a she ga pfue se! Eri a ke a mhes e abi ighie, anye tse anye ke khi eni ea mhu e! Aa kpa lie khi egbegbo a khili ighie, ishegho ni anye li nu e ke mhes e! ⁹ O li mhe eloe khi anye ighiusomhi na kee, Eshin e gba o ro shi asha ni o ga kholo ne nya. Eri anye li abi ighumha ni a rue e je obini olele ni a te ya gbolo we-a. Ni anye khi emhi ofeli ni egbo na agbo ee gia, ali ni igeni ee gia. ¹⁰ Irari oyi iKirisiti a ro bino anye shi eyeghe, ama ee a khi eni e lolo mholi ilisingme elemhi iKirisiti. Anye aa mholi ekpabo, ama ee a mholi ekpabo, ali khi egbo ea mu ekpe e na anye, a mu ekpe e na e. ¹¹ Ya ramhi amo, okiamhi ali okiam e o gbe anye ramhi, anye aa mholi emini a so, se ni ijeje ide. A ri ukpeloe a gbe anye, anye aa mholi ashini a la. ¹² Anye roshaka ri abo eyi anye e gbe ikanya. Ini egbo e ku itse e na anye, anye e ku isemhe na we, ini a mu okholi vule shi anye o, anye ri egbe mie.* ¹³ Ini ogbo o yese anye eva-a, anye ri unu ni o pfomhe soli o. Ramhi memena, eri a bino anye shi egbo afue ali iku ni e la agbo. ¹⁴ Aa khi eri mhi keke ebe ona ghi e ni mhi ro ri omama mu e. Eri mhia nono ni mhi kpaghie e obo, abi eni e bia eniye e lie nono ni wewe e kpaghie imi we obo. ¹⁵ U dobe ya mholi egbo agbele igbe (10,000) ododa ni e sese e ungmehi oyi ikirisiti, ama ita oghuo u lese mholi. Mhemhe khi ita e, ee a khi imimhe rote usomhi onete oyi iJesu iKirisiti ni mhi sese e.

* **4:12** Li ze Ika 18.3

16 Irarigho mhia nono ni a ke khonya mhe.† 17 Ona o ze ni mhi ro ghi iTimoti ghi e. Eri mhi nono ingme oyoli abi omo ni mhi bia, ali khi oni o o ga oyi Eshinegba ni o ri igesikia a gbe akanya na Onomhue o khi. ITimoti o ya gueye e angeli oyemhe abi mhi lie deba iKirisiti ali abi oni angeli oyemhe o li de shi osese ni mhia sese ingme oyi iKirisiti elemhi igbaa oyi eni e mie iJesu iKirisiti suo kpa.

18 Eghuo elemhi e, e tsua ipfua eke abine khi mhi aa ke e bhale ya feli e. 19 O kha ghole Onomhue, mhi ya kele bhale oobo. Eghenge agho, mhemheghuo mhi ya me abi eni egbo ni e tsua ipfua eke egho e lie ngme, ni mhi gbo me ekpabo nabi e khi wewe e mholi. 20 Irari eghiele ni Eshinegba o le shi awa udu, o a khi oyi ungmehi unu tse, ama oyi ekpabo lo. 21 Elo a nono ni mhi li ini mhi bhale? Mhi rue utali mholi obo bhale, abi mhi ri ayemhe inono ali o pfomhe bhale?

5

A khu inyoghuo na itsebo iteva ya fie

1 Mhi suo khi angeli itsebo e la iteva oye e. Onabi aa ya me iteva oyi eni ea miesuo kpa, a ga me iteva oye e. Ni o ramhi khi ogbo o nu inyoli onuzava a gbhe.* 2 A gbo ti ipfuabo a nga, ocho ni egbe e kha ro pfo e-a, ramhi ni a ro khu ogbo oghoghoe iteva oye e lasele. 3 Abi o ro tseku khia khi mhi nuata shi e egbe alo-gbugbugbu, ayemhe oyemhe o nu e la. Mhi she pfa ezogbo mu ogbo ni o ri ele emhi onana, abine khi mhi la agho. 4 Irarigho, ini a ri eva oyi Onomhue iJesu lona kugbe, ali ni ayemhe oyemhe

† 4:16 Li ze 1 iKori 11.1; iFili 3.17 * 5:1 Li ze iDeut 22.30

o ro nu e la, ali ni ekpabo eyi Onomhue o ro la e iteva,⁵ a rue ogbo oghoghò abo-a na okphaghie, ni o pfuèche idiegbe eyoli-a, ini a pfuese ayemhe oyoli ini iJesu Onomhue o bhale.

⁶ O ma kholo gba khi a tsua ipfuabo eke. Ni a ro o ze ni egbo enana e la iteva oye. Aa lese khi eri e li abi umiesobo oghuo ni o ri oili gbolo enekpole-a?[†] ⁷ A rue ogbo okholo onana iteva oye lasele, ni a me asha la ipfuase. IKirisiti khi omi osumha oyi iPasova ni a she ro luase obo na awa.[‡] ⁸ A khi ze ni awa ke rie le imu elemhi okholo ilili ni o li abine khi a kemhi ibuledi ni a ri ifuma nye. Awa khi eni e pfuase ali ena igesikia, ni awa ke ri ibuledi ni aa ri ifuma nye li imu.[§] ⁹ Abi mhi ro kpe te odode keke ebe ghi e, mhi gueye e a khi nu ogbo na itsebo ke kia kugbe. ¹⁰ Ama o a khi ingme oyi egbo ena agbo mhi ngme. Irari khi u mema ya lase elemhi agbo le neni u wa kie egbo ni e ku itsebo, ali ena emhi itoegbe ali ighiat o ali eni e e ga ikhumhi. ¹¹ Emini mhi ri onana ngme khi, a khi nu oni o miesuo olo-egbholi, ni o o ku itsebo kia kugbe, okekhi ogbo emhi itoegbe o, okekhi oni o ga ikhumhi, okekhi oni o yese ogbo eva-a, okekhi o donyo pfuèche egbe-a, okekhi oni o rie le alile. Khi ga nu egbo eghoghò le eminale kugbe.

¹² O a khi akanya oyawa ni awa ke gue ena odato ni e a miesuo ez o. Ena elemhi igbaa oyi eni e mie iJesu iKirisiti suo tse ni e lina ngeli awa kha lese ke gue ez o ¹³ Eshinegba o ya gue eni e a miesuo ez o, ama abi Ebe-no-pfuase o ngme oli khi, “A khu ogbo

[†] 5:6 Li ze iGal 5.9 [‡] 5:7 Li ze Okiali 12.5 [§] 5:8 Li ze Okiali 13.7; iDeut 16.3

okholo oghoghò ẹ iteva le.”*

6

Eni e mie suọ e khi ke lu egbe ẹzọ ikọtu

¹ Ini abi a li ga miesuọ abi inyoghuo a me ingme, elo o ze khi a lu egbe ẹzọ shi ikọtu oyi esọ-ẹzọ ni ẹa miesuọ, ocho ni a kha rọ ze ni eni e miesuọ e sọ ẹẹ oni ingme? ² Aa leşe khi awa ni awa miesuọ, khi awa ya gue ẹgbọ na agbọ ẹzọ? Ẹẹ ni a khi eni e ya gue agbọ ẹzọ, aa dobe a sọ shi ukuku ingme ifuabọ eyẹẹ? ³ Aa leşe khi awa ni awa miesuọ, khi awa ya gue igeni ẹzọ? Seẹ awa aa li ke dobe ẹ sọ egbe awa ikuku ingme na agbọ ona. ⁴ Elo o ze ni a rọ o tsua ingme ni a me ogbele kpa ke ghi esọ-ẹzọ ni ẹa mhue unu shi ingme igbaa oyi eni e mie iJesu iKirisiti suọ? ⁵ Eri mhia ngme ona ni omama o mu ẹ. Eri aa me ongeẹ ni o leşe ingme iteva oyeẹ, ni o dobe ya ri inyoghuo aava ni e miesuọ riẹle? ⁶ Elo o ze ni ongeẹ o rọ o rue inyoghuo oli le deba eni ẹa miesuọ ni e roli gue ẹzọ?

⁷ Emini o da ze khi a me iluegbe-ẹzọ ikọtu iteva oyeẹ ne, eri o rohasẹ khi eni e de a khi. Oni u kha rọ ri egbe mie ini a lue na ẹ, ni u kha rọ lama ni a li ẹ le, ⁸ u ri ochoghò vu ya lue na ẹgbọ, u li we ẹ le, gbo li shi eni e miesuọ elese.

⁹ A leşe gboo khi ona okholo o a ya lo Eghiele oyi Eshinegba. Aa khi di egbe ẹ. Ẹgbọ ni ẹ ku itsebo, okekhi eni ẹ ga ikhumhi, okekhi eni ẹ kia okia, okekhi emose idegbe, ali emose ni e nu emose enabi wewe ẹ gbhe, ¹⁰ li shi ighiatọ, okekhi ena emhi ituegbe, okekhi edonyo yese egbe-a, okekhi

* **5:13** Li ze iDeut 13.5; 17.7

eni ẹ yese ẹgbọ eva, wẹ khi eni e li ẹgbọ a le, e ya lo Eghiele oyi Ẹshinẹgba. ¹¹ Ẹghẹghẹ o la ọ ni ẹẹ a rọ kpẹ la agbọ oghoḡhọ, ama a she khuẹsẹ ẹ olamhẹ-a, a khuẹsẹ-a pfuasẹ, a pfa na ẹ, rọte eva oyi iJesu iKirisiti Ọnọmhue ali Ayemhẹ oyi Ẹshinẹgba oyawa.

Khi ke gbe ikanya itsebo

¹² Ọgbọ ọ dobe ya liẹ, “Emini o ghọle mhe mhi dobe ya riẹle.” Ama mhiẹ ọli, “Aa khi emhikpa e ti ni u riẹle.” Ali khi ini mhi tseku dobe ya riẹle emhikpa, mhi aa gbudu mele oghumha oyi emhikhoghuo-a.* ¹³ Wa liẹ khi, “Eminale khi oyi akpidi lo, ali khi akpidi o khi oyi eminale.” Igesikia onana o khi, ama ẹleghuo, Ẹshinẹgba ọ ya yese wẹ-a. Ama aa riẹle idiegbe eyawa shi itsebo ilili. Eri a riẹle idiegbe, ni awa rewe ke ga Ọnọmhue. Ali khi idiegbe oyawa oo mu Ọnọmhue egbe gba. ¹⁴ Ali khi Ẹshinẹgba ọ ya ri ekpabọ eyọli guise awa eghuli le, abi ọ guise Ọnọmhue oyawa eghuli le. ¹⁵ Aa lesẹ khi idiegbe oyawa khi uguabọ idiegbe oyi iKirisiti lo. Eri ọgbọ ọ ke ya rue uguobọ idiegbe oyi iKirisiti, ọ ke ku ọli gbe uguobọ oyi adegbe? Ọa zẹ ya li! ¹⁶ Abi aa lesẹ khi ọgbọ ni ọ da le deba adegbe ne, khi ọ she to egbọli ma ọni adegbe ọ? Idiegbe oghuo e ke khi, irari khi ebe ọọ li, “Wewe avavava, idiegbe oghuo e ke khi.”† ¹⁷ Ama ọgbọ ni ọ da to ma Ọnọmhue ọ ne, ayemhẹ oghuo e ke khi.

¹⁸ Me itsebo ikuku na, olamhẹ okhoghuo ọa la ọ ni o ri ichimhi a mu ọgbọ abi olamhẹ itsebo ikuku. Irari khi olamhẹ itsebo ikuku oo re ẹ lamhẹ shi idiegbe oyi yeye ghuo ọ. ¹⁹ Aa lesẹ khi idiegbe oye

* **6:12** Li zẹ 1 iKori 10.23 † **6:16** Li zẹ Igbae 2.24

ẹ khi owa ugamhi oyi Ayẹmhe-nọ-pfuase lọ, ni o la idiegbe oye, ni Eshinegba ọ rọ na ẹ? Ọa ke khi yeye u mhọli egbe ẹ, † 20 irari khi eri Eshinegba ọ de ghale. Irarigho, u mema ya ri idiegbe eye ri ufumhi na Eshinegba.

7

Ingme ingeli oyi omose ali okpotso

¹ Ni mhi rọ sọ shi ogbo ni a keke shi ebe ya mhila mhe.

O ti ini omose ali okpotso ẹa ya le deba egbe. ² Ama irari itsebo, omose ogbogbo ali ughue oli e ke le deba egbe, okpotso ali odoli e ke le deba egbe. ³ Omose ọ khi ri okiamhi ughue gbe ughue oli, okpotso ọ khi li ri okiamhi ughue gbe odoli. ⁴ Okpotso lolighuo ọa mhọli idiegbe oyoli, ama odoli ọ mhọli we. Igho o li khi egbe oyi omose, ọa khi omose lolighuo ọ mhọli idiegbe eyoli, ama ughue oli ọ li mhọli we. ⁵ A khi kie egbe, seẹ khi omose ali okpotso e lama shi egbe ọ khi wewe e ya nuata shi iledeba-egbe ne, ni e me asha mhọli ukuku eghẹghẹ rọ sọ iromhi. Oni eghẹghẹ o kha dose se, e gbo bhale ya lona, ini okphaghiẹ ọ khi me asha mu we fe, irari khi egbe ẹa ze ẹ mu shi ingme ughue. ⁶ Eri mhi khokho ona na ẹ, ọa khi ushi ni mhi shi ẹ shi eke na ẹ. ⁷ O ma kha ti gba ini ogbokpa ọ dobe ya la ọ ni ọa rue okpotso shi abi mhemhe lo. Ama awa nya awa aa li abeghuo. Eshinegba ọ somhi ogbogbo isomhopfa ododa. Ona ọ kha mhọli ona, olese ọ mhọli ogho.

† 6:19 Li ze 1 iKori 3.16; 2 iKori 6.16

⁸ Eẹ ni aa la ughue ghue ali esamhi-olimhi, o ti ne ini ẹa bie ye ughue abi mhemhe. ⁹ Ama ini ẹa dobe ya mu egbe we, e ke le ughue. O tine ni a ye ughue dose ocho ni a ro ya shito, egbe ee lala e shi ingme ughue.

¹⁰ Eẹ ni a la ughue, mhi mhesẹ ona na e, ni ọa rote obọ oyemhe bhale, ama obọ oyi Onomhue. Okpotso ọ khi rote obọ oyi odoli vu. ¹¹ Ama ini ọ li gho, ọ khi gbo ye ughue olese ghue, ochoghọ ọ ka nu odoli ro riẹle. Omose ọ khi gbudu khu ughue ọli. *

¹² Eẹ oyeẹ enekpole, mhi gue ona ye e, mhemhe mhi ngme ona, ọa khi Onomhue. Ini omose ni ọ miesuọ ọ rue okpotso ni ọa miesuọ ughue, o kha ghole oni okpotso ni ọ ro nu oni omose shito, oni omose ọ khi khu ọli. ¹³ Ini okpotso ni ọ miesuọ ọ ngeli na omose ni ọa miesuọ, ni oni omose ọ ro mhọli oghuemhe khi loli ya kie ri oni okpotso shi, oni okpotso ọ khi pfa oni ughue-a. ¹⁴ Irari khi okpotso ni ọ miesuọ ọọ rue ipfuase e bhale ughue oyoli, ali khi omose ni ọ miesuọ ọ ri ipfuase e bhale ughue oyoli. Ini ọa khi igho lo, imi e, eni ẹa pfuase e kha khi, ama abi o ke li ena khi, a she khuẹse we-a pfuase.

¹⁵ Ama ini oni ọa miesuọ elemhi wewe aava, ọọ nono ni loli lase oni ughue le, ọ ke vu. Emhikhoghuo ọa ke la akana ya mu omose okekhi okpotso ni ọ miesuọ mhue ini a me na. Eri Eshinegba ọ lu awa ni awa ro la agbo opfomhe. ¹⁶ Yeye okpotso, u fe lese ini itobo oye ode ọ kha ro mhue imiepfuese? Abi khi, yeye omose u lese ini itobo oye ughue ọ kha ro mhue imiepfuese?

* **7:11** Li ze iMat 5.32; 19.9; iMak 10.11-12; iLuk 16.18

17 Abibi o tseku li, oḡbḡbḡ o migha ashini o la ni Ẹshineḡba o rḡ lu ḡli, ali emini o lu ḡli shi. Ona o khi omhḡḡ ni mhi rḡ na igbaa oyi eni e mie iJesu iKirisiti suḡ nya. 18 Ini ḡmḡḡ o she sheḡ-a neni Ẹshineḡba o lu ḡli, o khi mu ḡli pfi riḡḡ. Ini ḡmḡḡ ḡa sheḡ-a ne neni a lu ḡli, o khi ya sheḡ-a. 19 ḡa mhue abi o ngme, ini ḡbḡ o sheḡ-a okekha khi ḡa sheḡ-a, emini o mema mu egbe khi, ni a rḡ ri ishi eyi Ẹshineḡba gbe akanya. 20 Oḡbḡbḡ o kie li abi o la o shi ni Ẹshineḡba o rḡ lu ḡli. 21 Oghumha u khi ni Ẹshineḡba o rḡ lue? Khi ze ni oḡḡ o naseḡ udu. Ama ini u meḡ aḡa ya pfa egbe e o le, li ḡḡ. 22 Irari khi ḡni o khi oghumha ni Onḡmhue o rḡ lu ḡli, ḡni a rue abḡ-a o ke khi, iḡḡ li khi ḡni a rue abḡ-a ni Onḡmhue o rḡ lu ḡli, oghumha oyi Onḡmhue o ke khi. 23 Eri a de e ḡhale, irarighḡ a khi gbo khi oghumha oyi ḡbḡḡḡ. 24 Inyḡḡhuo, ḡbḡbḡ o nu Ẹshineḡba la abi o li ni a rḡ lu e.

25 Shi ingme oyi ozele ni ea mu uḡḡḡ ḡḡ. Mhi aa rḡte obḡ oyi Onḡmhue mie ushi ni mhi ya shi na we, ama mhi ri ushi oyemḡḡ bhale abi ḡni a ri itobḡ ilelemhi khi ḡni a ri egbe e nga. 26 Ini a bino ingme ni a meḡ ḡbḡ memena, mhi sa khi o ti ini ḡbḡ o bie shitḡ abi o li. 27 U kha la uḡḡḡ se, khi dua ni u pfa li-a. Ini waa la uḡḡḡ ne, khi dua abi u li ya lo o. 28 Ama ini o khia khi u lo uḡḡḡ, waa pfiḡḡ, ini o riḡ khia khi u waa mu uḡḡḡ ḡḡ. Ama eni e rue ikpotso, e ya mhḡli anasemḡḡ elemhi ḡbḡ ona, mhi aa nono ni a meḡ onana.

29 Inyḡḡhuo emini mhi ri ona ngme khi eḡḡḡḡ o ke sheḡ. Rḡ te memena vu, emḡḡ ni e rue ikpotso, uḡḡḡ we e khi mu we egbe doḡḡ. 30 Eni e viḡ, e khi

zẹ ni o lo wẹ egbe dọse ode. Eni ẹ ghele, e khi zẹ ni oghẹle rue wẹ vu, eni ẹ de emhi, e khi zẹ ni emini e de e lo wẹ alo, ³¹ eni e mhọli emini e ri emhi na agbọ o riẹle, e khi zẹ ni e rue wẹ udu vu. Irari khi abi agbọ ona o laọ shi memena, o she ẹ dọse.

³² Mhia nono ni a rue udu ayele le. Ọmọse ni ọa rue ọkpotoso, ikanya eyi Ọnọmhue ẹa ku ọli ẹle-a, irari khi eri ọ nono abi lọli liẹ riẹle oghuemhe oyi Ọnọmhue. ³³ Ama ọmọse ni ọ rue ọkpotoso shi, eri isamhi agbọ ẹẹ nase ọli udu, irari khi eri ọ dua ni lọli ri egbe ke mu ughue ọli. ³⁴ Irarigho, eri isamhi eyọli ẹ kemhi eva. Eri ọmueshi ni ọa ye ughue, okekhi, ọmueshi ni ọmọse ọa ta owe lase ghue, ingme eyi Ọnọmhue ẹ mu ọli egbe. Eri ọ dua ni lọli ri idiegbe ali ayemhe oyọli na akanya oyi Ọnọmhue pfo nya. Ama ọkpotoso ni ọ ye ughue, emhi agbọ ọ sa, irari khi eri ọọ dua abi lọli li ri egbe ẹ ke mu ọdo.

³⁵ Eri mhi a ngme onana ni mhi kpaghie ẹ obo, ọa khi eri mhia nono ni mhi zu ẹ ode, ini a khi la ughue. Ochoghọ eri mhia nono ni a ke riẹle emini o te ode, ini udu oye o khi kemhi eva shi iregbena Ọnọmhue pfo oye.

³⁶ Ini ọmọse ọ me khi egbe ẹa ke ze lọli ẹ mu deba ọmueshi oyọli ni ọmọse ọa ta owe lase ghue, ni e ga lama na egbe khi wewe e ya ri egbe shi. Ni ọ ro she te ni ọ ye ughue abi o ye ni o, ọ rue oni ọmueshi ughue abi o ghole ọli shi. Ọa lamhe. ³⁷ Ama ọmọse ni ọ me khi lọli mhọli udu no toto ni ọ dobe ya mu egbọli mhue. Ini ọ lama shi udu oyọli khi lọli ẹa ya rue oni ọmueshi oyelue ne, oni ọmọse ọna ọ gue kia. ³⁸ Ọgbọ ni ọ rue ọmueshi oyọli ughue ọ gue kia. Oni ọa rue ọli, lọli ọ gue kia ne.

³⁹ Ọkpotoso ni ọ la ughue, ọa gbudu rọte obọ oyi ọdọli vu ini ọ da kie la agbọ. Ama ini ọdọli ọ ghua, ọ dobe ya ngeli na omose ni ọ nono, ama omose oni ọ miesuo ọ mema ya khi. ⁴⁰ Abi mhemhe so oni ingme shi khi, ọ ya mhọli oghẹle ne ini ọ shitọ khi ọa bie ke ngeli. Mhi sa khi mhi mhọli Ayemhe oyi Eshinegba ni mhi rọ ọ ngme ona.

8

Eminale ni a rọ luase ikhumhi

¹ Mena ni mhi rọ ngme nga ogbọ ni a mhila mhe ingme eminale ni a rọ luase ikhumhi.

Awa lese khi, “Awa nya awa ga mhọli ilese,” ingme ona. Eri ilese o ri ogbọ a ti-ipfuabọ nga ke titi egbe, ama eri inono o ri awa a kpaghie egbe obọ. ² Oni ọ dabi khi lolu lese gba, ọa kie lolo lese abi ọ kha li lese ne. ³ Ama ogbọ ni ọ nono ingme oyi Eshinegba, Eshinegba ọ lese ọli.

⁴ Ama memena, ingme oyi eminale ni a rọ luase ikhumhi, awa lese khi ikhumhi ọa khi emhikhoghuo elemhi agbọ, ali khi Eshinegba oghuo ọ khi. ⁵ Ini a tseku me emini a lu ilita ali ekhemhue, o khi eni e la idane o, okekhi ena ekekhe, ongewe ọa khi Eshinegba wekhi Onomhue. ⁶ Ama oyawa khi, Eshinegba oghuo kpe awa mhọli, ikhi ita ni emhikpa e rọte obọ oyọli bhale, ali oni awa la agbọ na, ali khi Onomhue oghuo ọ la ọ, ni ọ khi iJesu iKirisiti ni emhikpa e rọte obọ oyọli bhale ali ni awa rọte obọ oyọli la agbọ.

⁷ Ama ọa khi eni e miesuo nya e lese igesikia onana khi afue ilita e khi. Ama ingme oyi eni ilita ena, o she lo egbọ eghoghọ egbe ramhi khi ini e le eminale ni a rọ luasobo eghoghọ, eri ọ li we

egbe khi eni ilita e liẹ ga egho. Eri ona oọ yese udu oyewe ni o gue we ẹzo o-a, irari khi o a lolo toto imiesuo ne. ⁸ Ama eminale ẹa ti o gbo o mama Eshinegba. Ẹa ri awa ya khi eni ẹa ti ini awa aa le, wekhi eri e ke ri awa ya ti ne ini awa le.

⁹ Ama a kuegbe-a ini afa ni awa mhue ro o rieḽ emini o ghole awa o khi ya khi o zuode na o gboese ni o a toto imiesuo, ni o roli ya de pfilo olamhe. ¹⁰ Ini o gbo ni o mhue udu ni o a toto imiesuo ne o fe me khi ye ye ni u mholi ilese, khi u la udi olitsa e le eminale, u sa khi ogho o a ya ri udu nali ro ke le eminale ni a ro luase olitsa? ¹¹ Igho oni o gbo ni udu oyoli o a toto egho ni o khi inyoghue ni iKirisiti o ghu-a na o li ya opfu-a itobo ilese oye. ¹² Ini a da me na ne, iKirisiti u lue a na, ini u da lue na inyoghue ni a ga miesuo, eri u wa kuale udu oyewe ni o gue we ẹzo ni o a toto egho utse. ¹³ Irarigho, ini o da khia khi eminale ni mhi le o ri inyoghuo-mhe ya de pfilo olamhe ne, mhi aa ke gbo tigbe ya le eminale, ini mhi khi ya ze ni inyoghuo-mhe o de pfilo olamhe.

9

Afu ni aghiusomhi na kee o mholi

¹ Elo e kpomhe o le? Mhi aa khi aghiusomhi na kee? Mhi aa she me iJesu Onomhue oyawa, mhi re e mie oli suo? ² Ini o tseku khia khi mhia khi aghiusomhi na kee shi e gboese o, mhi aa li khi aghiusomhi na kee shi e o? Akanya ni mhi gbe iteva oye e o ro khashe khi aghiusomhi mhi khi shi e o.

³ Ina mhi li a so e gbo ni e ri unu a yese afu ni mhi mholi-a, ⁴ eri mhi aa fu te o ni a ri eminale ali onyo

a na shi akanya ni mhia gbe? ⁵ Mhi aa li fu tẹ ọ ni mhi li ẹ rue ọkpotoso ni ọ miesuọ shi, abi ighiusomhi na keẹ enekpọle, ali inyoghuo Onomhufe ali iPita e li roshi. Eghẹghẹ agho ni mhi li ke rue ọli mhufe obo ini mhia le asha? ⁶ Abi khi mhemhe ali iBanabasi tse anye lese khi eni e ri obo oyewe e gbe akanya ke ri eminale na egbe anye le? ⁷ A me okhọli-okhufe ni lolighuo ọ fali egbọli ota? Oghiale onoghuo ọa ya le emhi ekomhi eyọli? Oni ọ ri ena kia onoghuo ọa ya rote ena eyọli da amẹ inyeli?

⁸ Abi usamhi oyi egbo o li mhi lie ngme ọli, abi khi eri ushi ọa li mu ma ọ? ⁹ Irari khi a keke ọli shi ebe Ushi oyi iMosisi, “Khi mu ena onokpo unu zu ini u roli e mhele ikpamhi emhi.” Ingme oyi ena wefe khi Eshinegba ọ li gho lese sa? ¹⁰ Itobo oyawa ọ ro ngme onana? Ii, irari oyanye a ro ligho keke ọli. Itobo khi ogbo ni ọ gua ọ kha gua ni oni ọ khiese ọ ro khiese, eri e ga roli shi udu khi wewe e ya mhufe okemhi shi eni emhi ekomhi. ¹¹ Aborokhia khi anye she ri emhi ayemhe ko iteva oye e egho, anye khi eni e kha rote obo oye e li khiese emhi ikpaghiobo ni a me eloe.† ¹² Ini o khia khi egboese e te ni a ri ikpaghiobo e na, ọa khi anye kha ga mema te ọ ne? Ama anye ọa rue ete-awe oni afu ona.

Ochogho, eri anye ri egbe mie emini anye me kpa ini anye khi zu usomhi onete oyi iKirisiti ode. ¹³ Aa lese khi eni e la Owa Oyi Eshinegba a gbe akanya, khi oni owa e te e le eminale, ali khi eni e la atete e ga, eri e rote emini a ro luasobo e kemhi? ¹⁴ Igho, Onomhufe ọ li mhesẹ ọli eni e ri usomhi

* **9:9** Li ze iDeut 25.4; 1 iTimo 5.18 † **9:11** Li ze iRom 15.27

onete a tse abọ, e rọte ọ ke le emhi.‡

15 Ama mhia kie ri eni afu ena gbe akanya deba ẹ, wẹkhi eri mhi kẹkẹ ebe ona ni a ba riẹlẹ emhi eghoghọ na mhe. O tinẹ ni mhi bie ghu-a ni ọgbọ ọ rọ liẹ mhi khi tono obọ udu. 16 Mhia mhue afu ni mhi rọ tono obọ udu shi usomhi onete ni mhi rọ tse abọ. Eri a mhese ọli na mhe. O ma kholọ mhe egbe ini mhia ri oni usomhi onete tse abọ! 17 Ini o khia khi eri mhia tsabọ ungmehi oyi Eshinegba itobọ khi o ghọle me. A ya fali mhe ota. Ama ini o riẹ khia khi ọa ghọle mhe, emini Eshinegba ọ rọ nga mhe obọ lọ ni mhia riẹlẹ 18 Ighe ifata ni mhi ke ya mie mena? Afa o khi na mhe ni mhi ke tsabọ oni usomhi onete, ni mhia khi oki shi ọ, ni mhia mie emini e khi eyemhe shi akanya oyi itsabọ usomhi onete.

19 Mhemhe ghuo mhi mhese ona na egbemhe, mhia khi oghumha oyi ọgbọkhoghuo, ama mhi ri egbe mhe mele oghumha oyi ọgbọkpa-a, ni mhi rọ lu ebubu ẹgbọ na iKirisiti abi mhi li dobe. 20 Abi mhi rọ nu ẹgbọ iJu u gbe akanya, mhii ngeli abi ọngi iJu ni mhi rọ dobe lu we. Abi o riẹ khia khi ushi iMosisi ọa mu me, mhi kiele ẹ ngeli abi oni ushi o mu ini mhi nu ẹgbọ ni e la oni ushi gbe akanya, ni mhi dobe lu we. 21 Igho o li khi, abi mhi rọ nu ẹgbọ iJeta ẹ gbe akanya, mhi ngeli abi ọgbọ ni ọa khi iJu ni ushi iJu ọa mu ni mhi rọ dobe lu we. Ona ọ liẹ khi mhi aa ke ri ushi oyi Eshinegba a gbe akanya, ama ushi oyi iKirisiti mhi rọ gbe akanya. 22 Ini mhi la ifuabọ oyi eni irudunga oyewe ọa toto, irudunga oyemhe o li abi oyewe, ni mhi rọ dobe lu

‡ 9:14 Li ze iMat 10.10; iLuk 10.7

wẹ. Emhikpa mhia mela-a na ẹgbọ nya, ni mhi rọ tsumhi ẹghuo, ode ni mhi ya te doḅẹ riẹḅẹ ọli kpa.

²³ Enana nya, irari oyi usomhi onete mhi rọ lighọ ni mhi mhue okemhi shi ikhivose eyoli.

²⁴ A lese khi ebubu ẹgbọ e migha shi unamhi ni a na, ama oghuo elemhi wẹ o kpẹ na a pfo, ni o mie eleli unamhi. Irarighọ, a na ode ni a te ya mie eleli oyi unamhi. ²⁵ Eri ogbokpa ni o la unamhi ya na o kpẹ ẹ wena ushi unamhi egbegbo. Eri ẹ na ni e mie arula oghie ni ọọ kẹ-a. Ama arula ni o la o agbo agbo awa na unamhi ẹ shi. ²⁶ Onana o zẹ ni mhi rọ na unamhi oyemhe sheshe ya ramhi ukpese. Loli o zẹ ni mhia rọ li abi opfiokpa ni ọọ pfi ekpa kua irarogbe. ²⁷ Eri mhia nase egbe eyemhe ni mhi doḅẹ mhesẹ ke na wẹ. Mhi aa nono, ini mhi tsabọ oni usomhi onete ona se, ni mhi khi oni a khu pfi.

10

A rọte okhe oyi ẹgbọ iZireni tse agua ye ẹgbọ

¹ Inyoghuo, mhia nono ni a sato emini itita awa ni e deba iMosisi e me. Oguese oyi otughunu o khukhu wẹ, wewe nya e gbo rọte okẹ ifulo ya dose tselele.* ² Elemhi otughunu ali okẹ oniemi e la batazi abi eni ẹ deba iMosisi. ³ Wewe nya e le eminale ayemhe.† ⁴ E gbo da amẹ oyi ayemhe oghuo ni o rọte eche ayemhe ni oo deba wẹ tu. Oni eche khi iKirisiti.‡ ⁵ Abi o tseku li ghọ, egbe ẹa mu

* **10:1** Li zẹ Okiali 13.21-22; 14.22-29 † **10:3** Li zẹ Okiali 16.35

‡ **10:4** Li zẹ Okiali 17.6; iNgba 20.11

Ẹshinẹgba deba ebubu wẹ, itobọ igho, eri a miatse ilimhi eyewe ku odagbe ifufu. §

⁶ Mena, ena nya irọkhasẹ e khi na awa, ni o tse agua ye awa, awa khi mhue oghuemhe na emhi ebe abi wewe e li,* ⁷ wẹ khi ilita awa ya ga abi eghuo o e li. Ebe-no-pfuase o ngme o li khi, “Eni egbo e shito le, e da, e gbe ishimhi idobie, e ku itsebo.”† ⁸ Awa khi khili ena itsebo abi eghuo o e li, ni o ze khi agbele uye ali ese, 23,000, e ghuloa ogbeleghuo.‡ ⁹ Awa khi mu Onomhue fe bino abi eghuo o e li, ni enye e ro gbolo we-a. § ¹⁰ Awa khi wolọ abi eghuo o e li ni Ageni eghuli o ro gbolo we-a.*

¹¹ Eri emhi ena nya e li we, ni a ro sese awa ingme ele-lese, a keke we shi eke tse agua ye awa ni awa la eghẹghe ikpukhokho agbo ona.

¹² Ini u dabi khi u migha, guẹ kia ini u khi de ode-a. ¹³ Aa me imufe okhoghuo ni a me egbe, ni o a khi onabi egboese ea me ghue. Ama Ẹshinẹgba oni a ri egbe e nga lo. Oa ya ze ni a mu e fe ni o fu dose e, ni aa ya dobe ri egbe mie. Ama ini a mu e fe, Ẹshinẹgba o ya ri ode ni a te ya pfue o bhale, ni a ro dobe ya ri egbe mie.

¹⁴ Irarigho, inyoghuo, a nuata shi ikhumhi o. ¹⁵ Eri mhi nu e ngme abi egbo elesingme. Eẹ ghuo a sa emini mhi ngme. ¹⁶ Ini awa rote uko ni awa lema Ẹshinẹgba o khivose shi da, o a khi o lia eyi iKirisiti awa da? Ini awa le ibuledi ni awa kemhi, o a khi idiegbe oyi iKirisiti ni awa le?† ¹⁷ Irari khi

§ **10:5** Li ze iNoba 14.29-30 * **10:6** Li ze iNoba 11.4 † **10:7** Li ze Okiali 32.6 ‡ **10:8** Li ze iNoba 25.1-18 § **10:9** Li ze iNoba 21.5-6 * **10:10** Li ze iNoba 16.41-49 † **10:16** Li ze iMat 26.26-28; iMak 14.22-24; iLuk 22.19-20

ibuleḍi oghuo o khi, awa nya ini awa tseku bu, idiegbe oghuo awa khi, irari khi eminale oghuo awa kemhi.

¹⁸ A sa ingme oyi egbo iZireni ghue. Oa khi eri wewe nya ni e le eminale ukhomhi atete ugamhi e ga mholi obo shi oni ugamhi oyi Eshinegba egho?‡

¹⁹ Eri mhi ri ona lie khi olitsa ali eminale ni a ro luase oli khi egbegbi emhi e khi? ²⁰ Iiye o! Emini mhi a ngme khi, emini eni e ga ikhumhi e ro luase obo atete, okphaghi e rewe e luase, oa khi Eshinegba. Mhi aa nono ni a mhue kugbe iyemhe okphaghi e o. § ²¹ Wa ya rote uko oyi Onomhue da, u gbo rote uko oyi okphaghi e da. Wa ya rote ukpeko oyi Onomhue le, u gbo te ukpeko oyi okphaghi e le. ²² Abi khi eri awa nono ni Onomhue o ke kpe ofuma? Eri awa dabi khi awa toto dose oli?*

Epfua ni eni e miesuo e mholi

²³ “Emini o ghole awa, awa dobe ya riele.” Abi a li ngme oli. Ama aa khi emhikpa o mholi eleli. “Emini o ghole awa awa dobe ya riele.” Ama aa khi emhikpa o mholi ikpaghiobo. † ²⁴ Ogbokhoghuo o khi lese ke na shi onote oyi egboli tse ama onete oyi egboese.

²⁵ Elamhi kpa ni a ro o de oki, ke de oli le, khi ri irari udu oye ni o o gue e ez o mhila ogbo okhoghuo shi o. ²⁶ Irari khi Ebe-no-pfuase o ngme oli khi, “Eke ali emini e la o nya, khi Onomhue o ga mholi we.” ‡

‡ **10:18** Li ze iLev 7.6 § **10:20** Li ze iDeut 32.17 * **10:22** Li ze iDeut 32.21 † **10:23** Li ze 1 iKori 6.12 ‡ **10:26** Li ze Iwolo 24.1

²⁷ Ini ogbo ni o a miesuo o lue ukue, ni u ro sa li shi udu khi u ya ye, le emiemini o ro shi e eke. Khi mhila ogbo okhoghuo oyi udu ni oo gue ogbo ezọ. ²⁸ Ama ini ogbokhoghuo oo ye, “Eminale ona, ikhumhi a roli luase.” Khi le oni eminale ogho, irari usamhi udu oyi oni o gueye ogho, ali irari udu oye. ²⁹ Aa khi irari usamhi udu oye, ama irari usamhi udu oyi oni ogbo ogho. “Elo o ze khi ogboese o ke ya khi ozuode shi epfua oyemhe, irari udu oni o gue ogbo ezọ oyi oli? ³⁰ Ini mhi kphemhi na Eshinegba shi eminale ni mhia le, elo o ze khi ogboese o ke tsue mhe shi eminale ni mhi kphemhi shi?”

³¹ Abi o laọ shi khi, emiemini u wa riele kpa, ni u wa le, ni u wa da, riele oli shi ufumhi oyi Eshinegba.

³² Khi ngeli angeli ni o ya ri ogbokhoghuo de, o khi egbo iJu okekhi egbo iJeta okekhi igbaa oyi eni e mie iJesu iKirisiti suo eyi Eshinegba. ³³ Eri mhi dua ni mhi riele emini o ti ogbokpa eloe odekhode. Irari khi mhia lese na khu oyi mhemhe ghuo, ama oyi ogbokpa ini a mie we pfuese.

11

¹ A ke khonya mhe abi mhi lie khonya iKirisiti Onomhue.*

Ukhomhi iguese elemhi ugamhi

² Mhi kueghie e shi abi a lie sato mhe egbe ni a ro a deba ose e ni mhi sese e.

³ Ama mhi a nono ni a lese khi iKirisiti o khi ukhomhi oyi omose nya, ali khi omose o khi ukhomhi oyi Okpotso. Ama Eshinegba o khi

* **11:1** Li ze 1 iKori 4.16; iFili 3.17

ukhomhi oyi iKirisiti. ⁴ Irarigho, omose ni oo so iromhi okekhi eri o ngme ungmehi imeguele, ni o ro da ri emhi guese ukhomhi ne, oyeghe o ro ghi iKirisiti ni o khi ukhomhi oyoli. ⁵ Igho okpotso okhoghuo ni oo so iromhi okekhi eri o ngme ungmehi imeguele, ni oa ro da ri emhi khukhu ukhomhi ne, eri o yeghe-a, eri o ri odoli ni o khi ukhomhi oyoli she-a, eri o bie li abine khi o kpogholo itsu ukhomhia. ⁶ Ini okpotso oa da khukhu ukhomhi ne, o ka ta itsu ukhomhi-a nyaa. Ini o da khia khi emhi omama oo khi ini okpotso o kpogholo itsu-a egho, o ke khukhu ukhomhi oyoli. ⁷ Oa ye ni omose o khukhu ukhomhi oyoli, irari khi irokhokho ali ufumhi oyi Eshinegba o khi. Ama okpotso ufumhi oyi omose o khi.† ⁸ Irari khi aa rote egbe oyi okpotso ma omose, ama idiegbe oyi omose a te ma okpotso. ⁹ Aa ma omose na okpotso, ama omose a ma okpotso na.‡ ¹⁰ Itobo onana, ali irari oyi igeni, okpotso o ke khukhu ukhomhi oyoli ni o ro rokhase khi o kie la omhese oyi odoli.

¹¹ Elemhi Onomhue ni awa ga la, okpotso oa khi ongeli, we khi omose o khi ongeli ni wewe aava ea mhue abi e lie rielle ugamhi kugbe. ¹² Irari khi abi a rote omose ma okpotso, igho okpotso o li bia omose. Ama emhikpa obo oyi Eshinegba e te bhale. ¹³ Ee ghuo a so o bino ini o ti ni okpotso o ke so iromhi lema Eshinegba oa ri emhi khukhu ukhomhi elemhi owa ugamhi? ¹⁴ Abi a ma emhi nya shi rote eke vu, oa sese e khi, omama o khi ni omose o ro mhue itsu ni e nue dolu shi ukhomhi? ¹⁵ Ama khi ini okpotso o mhue itsu ni e nue shi

† 11:7 Li ze Igbae 1.26-27 ‡ 11:9 Li ze Igbae 2.18-23

ukhomhi khi ufumhi ali isomhotse o khi na li? Eri a ri itsu ni e nuata na li ni o rọ khukhu ukhomhi. ¹⁶ Ini ogbọ o nono ni lọli khako shi ingme onana, emini mhi mhue ya ngme khi, anye-a mholi ode olese ni anye te e rięle, igho li khi igbaa nya eyi eni e mie iJesu iKirisiti suo eyi Eshinegba.

Ushi oyi Eminale no pfuase oyi Onomhue
(iMat 26.26-29; iMak 14.22-25; iLuk 22.14-20)

¹⁷ Rote omhesę ni mhi rọ bhale, mhi aa kuęghię e, irari khi ilona kugbe shi ugamhi oye e, oọ li oyese dose onete. ¹⁸ Irari onodode, a she gueye mhe khi okemhi oọ la iteva oyeę ini a lona ilegba abi eni e mie iJesu iKirisiti suo. Mhi mie shi o khi igho o khi. ¹⁹ Aa me emini o ze khi aa ya khako. Ama oni ekhako ona o ya ri eni Eshinegba o mie iteva oyi e khasę. ²⁰ Ini a lona kugbe shi oghuo, o a khi eminale oyi Onomhue o khi ni a le, ²¹ Irari khi ini a le, aa ya migha khe egbe. Ogbogbo o rue eminale oyoli e le. Irarigho, eri eghuo e da pfueche egbe-a, eghuo ea ga me le kpa. ²² Aa mhue apfe oye e ni a la le ni a la da? Abi khi eri a ri eloe a gbe igbaa oyi eni e mie iJesu iKirisiti suo oyi Eshinegba? Eri a nono ni a ri omama mu egbo ni ea mhue emhikhoghuo? Se a nono ni mhi ngme shi onana? Eri mhi ya kuęghię e mena? Iiye o!

²³ Irari khi obọ oyi Onomhue mhi te mie osese ni mhi sese e. Khi iJesu Onomhue, eliyose ni a roli de, o rue ibuledi, ²⁴ o kphemhi na Eshinegba o khi oli-a, oọ li, "Idiegbе oyemhe na ni a rọ na e, a ke li ona rọ sato mhe egbe." ²⁵ Igho o gbo li, abi e rọ le se. O rue uko onyo, oọ li, "Onana o khi uko oyi ilama kugbe onogbo, ni a ri o lia eyemhe rięle. Ini a da lina

da ne, eri a da li rọ sato mhe egbe.”²⁶ Irari khi eghẹghẹ kpa ni a rọ da le ibuledi onana ni a rọ da oni uko onana ne, eghuli oyi Onomhue u rọ tse abo egho neni o ya bhale.

²⁷ Onini o da le ibuledi oyi Onomhue ni o gbo rọte uko oyoli da, ode ni o a gbe akanya ne, o she lue, o lamhe shi idiegbe ali oia oyi Onomhue o.

²⁸ Irarigho, ogbogbo o bino egboli bie ne neni o tigbe le, neni o rọte oni uko da. ²⁹ Ini u waa da lese emini oni idiegbe oyi Onomhue ona o migha shi ne, ni u rọ da le oni ibuledi ni u rọ gbo te oni uko da, u she le u gbo da rọ ri iguezo bhale ghi egbe e.

³⁰ Ona o ze ni ebubu e e rọ o ghua, eghuo ea mhue ochi, ebubu e she ghulo-a. ³¹ Ini awa kpe gue egbe awa ezọ awa aa ya de pfilo ezọ oyi Eshinegba. ³² Ini Onomhue o gue awa ezọ, eri o sese awa ingme ini awa khi nu agbo pfua.

³³ Irarigho, ee inyoghuo-mhe, ini awa lona ni awa rọ ya le eminale oyi Onomhue, awa ke migha khe egbe. ³⁴ Ini a me oni okiamhi oo gbe, o la apfe le emhi ini a khi lo ezọ oyi Eshinegba, ini a lona kugbe. Mhi ya pfuse ingme enekpole ngme ini mhi bhale.

12

Isomhopfa Ayemhe

¹ Mena ni mhi rọ so shi ogbo ni a mhila mhe ingme isomhopfa Ayemhe-no-pfuase.

Mhia nono ni a lese egbegbingme ni o la o. ² A lese khi eghẹghẹ ni a rọ khili eni ea miesuo, a di e lo ode ni a la luase ilita ni ea mhue ayemhe. ³ Mhia nono ni mhi gueye e khi aa me ogbo ni Ayemhe oyi

§ 11:25 Li ze Okiali 24.6-8; ijere 31.31-34

Ẹshinẹgba o rọ gbe akanya ni ọ ya liẹ, “A pfi unu na iJesu!” Aa mẹ ọni ọ gbolo ya liẹ, “iJesu ọ khi Ọnọmhue!” Ini ọa li khi Ayẹmhẹ-nọ-pfuase ọ sẹsẹ ọli.

⁴ Isomhopfa ọdọda e la ọ, ama Ayẹmhẹ ọghuo ọ kemhi wẹ. ⁵ Ode ebubu e laọ ni a te ẹ ga Ọnọmhue, ama Ọnọmhue ọghuo awa ga. ⁶ Ode ọdọda Ẹshinẹgba ọ te ẹ gbe ikanya elemhi agbọ eyi awa, ama ọni Ẹshinẹgba ọ lighọ gbe oni akanya ona rọte idiegbe oyi awa nya. ⁷ Ogbogbo a ri isomhopfa Ayẹmhẹ na, ni ọ rọ ke gbe akanya ni o kpaghiẹ ogbokpa obọ. ⁸ Ọni Ayẹmhẹ lọli ọ ri isomhopfa oyi ungmehi ẹgbhali na ọgbọ ọghuo. Ọni Ayẹmhẹ ọ kie gbolo ri isomhopfa ilẹsingme a na ọgboese. ⁹ Ọni Ayẹmhẹ ọ gbo ri irudunga oniẹmhi a na ọgbọ. Ọni Ayẹmhẹ ọghuo ọ kie gbo ri ekpabọ na ọgboese ni ọ rọ ri ọgbọ toto. ¹⁰ Ọni Ayẹmhẹ ọ ri ekpabọ na ọgbọ ni ọ rọ gbe ikanya ọnyalọ, ọ ri ekpabọ na ọgboese ni ọ rọ mẹ ekẹ guele. Ọ gbo rọ-na ọgboese ni ọ lẹsẹ ikhiọda ni o la iyẹmhẹ ọdọda ọ. Ọ rọ-na ọgbọ ni ọ rọ dobe ẹ ngme ẹmuẹ ọda, ọ rọ-na ọlese ni ọ dobe guele abi oni ẹmuẹ oghọ o ngme. ¹¹ Ama Ayẹmhẹ ọghuo ọ kie khi ni ọ ga gbe eni ikanya eghọ abi o ghọle ọli shi. Ọ ri isomhopfa ọdọda na ọgbogbo.*

Idiegbe oghuo ni o mhue iguabo ọdọda

¹² Eri iKirisiti ọ li abi idiegbe oghuo ni o mhue iguabo ọdọda, idiegbe oghuo o kie khi, ini o tseku mholi iguabo ebubu ọdọda.† ¹³ Ighọ awa nya awa gbo li, o khi ọngi iJu u khi, okekhi ọnge iJeta, o ke khi oghumha oo, o ke khi ọni ọọ khi oghumha, a she batazi awa shi idiegbe oghuo rọte ọni Ayẹmhẹ

* **12:11** Li zẹ iRom 12.6-8 † **12:12** Li zẹ iRom 12.4-5

oghuo ogho, a kie gbo ri oni ayemhe oghuo ogho na awa.

¹⁴ Irari khi idiegbe o a khi uguobo oghuo tse loli nya o khi, ama iguabo ni e bu o mholi. ¹⁵ Ini owe o gueye obo, "Irari khi mhia da khi obo, mhi aa ke kugbe idiegbe o," Oni owe o a kie khi oyi idiegbe? ¹⁶ Ini esọ o o khi, "Irari khi mhi aa khili eloe, mhi aa ke khili oyi oni idiegbe." Ogho o ya lie khi o a ke la oni idiegbe? ¹⁷ Ini idiegbe nya o khili eloe lo, se o kha li ke suo. Abi ini idiegbe nya o ke khili esọ lo, se o kha li ke suo issue? ¹⁸ Abi o li khi, eri Eshinẹgba o tono iguabo egbe ododa ma shi idiegbe abi o li nono o li shi. ¹⁹ Idiegbe o ya gbapfo, ini o khia uguabo oghuo tse loli nya o khi? ²⁰ Abi o li khi, iguabo ododa e la o, ama idiegbe oghuo kpe o khi. ²¹ Irarigho, eloe o a ya lie obo, "Mhi aa mhue emini mhi re ya li!" We khi ukhomhi o ya lie awe mhia mhue emini mhi re ya li. ²² Ini awa te ukiẹkie o obini o kpole oyi ingme ona bino o li, iguabo oyi idiegbe ni o a lolo toto, o a ze idiegbe ya tsua pfi, ²³ ama idiegbe ni awa bino khi ea lolo mu eloe, we we awa ga sono itsua guese. Awa a kuegba guese iguabo idiegbe ni o a ti ni a ke khueghie-a shi eke ni aa me eloe, ²⁴ Ama awa aa ya so itsua guese ikpe ni e ze ro o shi eke ni egboese e me eloe. Eri Eshinẹgba o ligho riele idiegbe, ni awa mu ekpe na iguabo ni e li abine khi ea lolo mu eloe. ²⁵ Itobo igho, okemhi o a la idiegbe, eri ikpe ododa egho e ri eloe a khu egbe. ²⁶ Ini asha eghuo o o me osoli, ikpe enekpole nya e li nu o li a me oni osoli. Ini a ri ekpe na uguabo idiegbe oghuo eri enekpole nya e e ghele.

²⁷ E e nya idiegbe oyi iKirisiti a khi, ogho o o

khi uguobo oyoli. ²⁸ Elemhi igbaa oyi eni e mie iJesu iKirisiti suo, onodode, Eshinegba o ze ighiusomhi na kee, onuzi-eva o ze emekeguele, onuziese, esese, o tigbe ri eni e gbe onyaloa shi asha eghuo, gbo li shi eni mholi isomhopfa ni a ro ri ogbo ze. O gbo ze eni e gu e kpaghie egboese obo, elese o zewe eni e gu ri omhese kia, ali eni e ngme emue ododa.† ²⁹ Wewe nya e khi ighiusomhi na kee? Wewe nya e khi emekeguele? Wewe nya e khi esese? Ogbokpa o dobe a gbe akanya onyaloa? ³⁰ Wewe nya e mholi isomhopfa oyi iri-ogbo ze? Egbonye e gu ngme emue ododa? Abi khi wewe nya e gu e guele abi oni emue ododa o ngme? ³¹ Irarigho, awa ke nono isomhopfa ni o tine nya. Mhi ya ri ode ni o tine nya khas e.

13

Inono

¹ Ini mhi ga gu e ngme emue oyi egbo ali oyi igeni, ni mhi aa ro mhue inono, okeke ulo ali okeke ipepe itasa mhi khi. ² Ini mhi mhue isomhopfa imekeguele ali ni mhi ro lese udi osheli ali ilese nya a guele. Mhi kha mholi irudunga ni a ro dobe ooghie ite, ni mhi aa ro mhue inono, afue mhi khi.* ³ Mhi kha ga ri emini mhi mhue nya somhopfa, ni mhi ro ga ri egbe mhe bhale ni a tose-a ni mhi ba tono obo udu, ni mhi aa ro mhue inono, mhi aa mhue elele okhoghuo ni mhi ya me. ⁴ Eri inono o mholi irabomudu, o mholi isomhelemhi. Oa ya kpe ofuma, oa ya tono obo udu, oa ya vuse ike. ⁵ Inono oa ya ngeli angeli

† 12:28 Li ze Efi 4.11 * 13:2 Li ze iMat 17.20; 21.21; iMak 11.23

obe, ọa ya khu oyọli tṣẹ, elemhi ẹa keṣe bi inono, ọa ya keṣe ingme ni a li ọli ya shi na ọgbọ. ⁶ Ọa ya mẹ emhi obe ni ọọ ke gheṣe shi ọ, ama emhi egbegbingme o gheṣe ẹ shi. ⁷ Ọa ya mhọli ukhimhi- elemhi. Irudunga ali irudushi, ali irabọmudu oyọli ọa ya ba li ku.

⁸ Inono ọa mhue ukpeṣe. Imekeṣe e la ọ, eritṣẹ khi e ya dọṣe, isomhopfa oyi ingme-ẹmuẹ ọdọda e la ọ, ama e ya dọṣe, iṣingme e la ọ, ama e ya dọṣe. ⁹ Irarikhi isomhopfa iṣingme ali imekeṣe oyawa ẹa ya gba pfo. ¹⁰ Ama ini oni o gba pfo o ramhi, oni ọa gba pfo o kele-a. ¹¹ Abi mhi rọ khi ọmọ, ẹmuẹ ali isamhi ali akhọkhọmhe eyemhe, e khi eyi ọmọ. Mena abi mhi rọ ke khi ọgbhali, mhi aa ke mhue emini mhi ri angeli ọmọ a li. ¹² Emini awa mẹ memena, eri o li abi aroro ni awa rọte ughegbe ẹ mẹ lishi-lishi. Egheghe agho o kha ramhi, awa ya mẹ ọli ghemhe, ghe ẹ. Emini mhi leṣe, ọa gba pfo, ama egheghe agho, o ya gbapfo, abi Eshinegba ọ li seṣe mhe pfo.

¹³ Ama eni emhi ese enana e kie migha: Irudunga, irudushi, ali inono. Oni o ga fune nya shi we ọ khi inono.

14

Isomhopfa imekeṣe ali ẹmuẹ

¹ Zobẹ ni inono o khi emini u na a khu.

Ke dua ni u mhọli isomhopfa eyi Ayemhe no pfuase, tete isomhopfa imekeṣe. ² Ọgbọ ni ọọ ngme ẹmuẹ ni ọgbọ ọa leṣe emini ọọ ngme, Eshinegba ọ nu ẹ ngme, irari ọgbọkhoghuo ọa ya leṣe emini ọ ri eni ingmemhi ngme. Egbegbi ingme

osheli ọ rọte Ayemhẹ no pfuase ẹẹ ngme. ³ Ama ọgbọkpa ni ọ meke ngme guele, eri ọọ nu ẹgbọ ọ ngme, o kpaghie wẹ obọ, ọ ri udu shi wẹ ọ, ọ ri udu pfoṃhi wẹ. ⁴ Ọgbọ ni ọọ ngme ẹmuẹ ọda ni ẹgbọ ẹa leṣe emini o ngme, egbọli ọọ kpaghie obọ, ama ọgbọ ni ọ mekeguele, igbaa oyi eni e mie iJesu iKirisiti suọ nya ọọ kpaghie obọ. ⁵ O ga ghọle mhẹ ni ẹẹ nya a ke ngme ẹmuẹ ọdoda, ama oni o ghọle mhẹ ne khi ni a ga mhọli isomhopfa imekeguele. Irari khi ọni ọ mekeguele ọ mu ẹloe dọse ọni ọ ngme ẹmuẹ ọda. Sẹẹ ni eri ọgbọ ọ la aghọ ni ọ guele abi ọ ngme ni ọgbọkpa ni ọ la igbaa oyi eni e mie iJesu iKirisiti suọ ọ mhue ikpaghiobọ.

⁶ Ighọ inyoghuo, ini mhi bhale deba ẹ ni mhi rọ ọ ngme ẹmuẹ ọda, onete onoghuo o ya rieṣe na ẹ? Oa khi ini, mhi gue irokhase ni mhi rọte obo oyi Eshinegba me ye ẹ, okekhi emini mhi leṣe mhi gueye ẹ, okekhi imeguele mhi gueye ẹ, okekhi ungmemhi oseṣe mhi rọ bhale ghi ẹ, o ya ri eleli na ẹ? ⁷ Bino itsua ni ẹa mhue ayemhẹ, ni ẹẹ ngme, enabi ofele ali ẹfa. Sẹẹ ọgbọkhoghuo ọ li ya leṣe emini a kpheli, ini ọa suọ obini a mu abọ wẹ je? ⁸ Ali ọni ọọ pfi akala, ini ọa li pfi ọli gboo ni o de uruli ni a suọ, oghuo ọ ya mu egbe okhọli? ⁹ Ighọ khi, ini u ri emue ni ẹgbọ ẹa ya suọ ọ ngme ingmemhi ni e mhọli ilẹsingme, ọgbọkhoghuo ọa ya leṣe emini wa ngme. Eri u leṣe ke ngme kua idane! ¹⁰ Ẹmuẹ ebubu e la agbọ ona, wewẹ nya e khi eni e ti shi eni ẹ ngme wẹ ọ. ¹¹ Ama ini mhi aa leṣe ẹmuẹ ni a ngme, ọni ọ nu mhẹ ngme, ọpfese ọ khi shi me ọ, mhẹmhẹ khi ọpfese shi ọli ọ. ¹² Aborokhia khi isomhopfa eyi ayemhẹ e mema kiele ẹ ghọle ẹ

eghọ, a ke nono isomhopfa eni e ya ri ikpaghiobo ghi igbaa oyi eni e mie iJesu iKirisiti suọ.

¹³ Itobo ighọ, ọni ọọ ngme emue ọda ọ mema ya lema a ri ekpabọ ni ọ rọ ọ ke guele abi ọ ngme na li. ¹⁴ Irari ini mhi ri emue ọda a sọ iromhi, ayemhe oyemhe ọọ sọ iromhi, ama udu oyemhe ọa ya mhe mhue emini ọ mu ọ. ¹⁵ Se mhi ke ya li shọ? Mhi ga ya riele wewe eve-eva ena. Eri mhi ya ri ayemhe oyemhe sọ iromhi, mhi gbo li ri udu oyemhe sọ. Mhi ya ri ayemhe oyemhe to uwolo, mhi gbo li ri udu oyemhe to. ¹⁶ Ini u ri ikphemhi na Eshinegba elemhi ayemhe tse, se egbo enekpole ni ẹa ya suọ ikphemhi ni u rọ na Eshinegba e lie suọ, ni e mie Atse shi ẹ oni iromhi ali ikphemhi? Ẹa mhue abi e li ya lese emini u wa ngme. ¹⁷ Ini o tseku khia khi iromhi ikphemhi eye khi enete lo, ẹa ga kpaghie egbo enekpole obọ. ¹⁸ Mhi kphemhi na Eshinegba khi mhi ga ngme emue ọdoda dose ẹẹ nyaa. ¹⁹ Ini a la ugamhi igbaa oyi eni e mie iJesu iKirisiti suọ, o ti mhe egbe ni mhi lese ngme ikpamhi ingmemhi ishe tse ni egbo ya suọ abi mhi rewe ngme, rọ sese we, ocho ni mhi rọ ri emue ọda ya ngme ingmemhi agbele ni ogbokhoghuo ọa ya suọ abi mhi rewe ngme.

²⁰ Inyoghuo-mhe, a khi ke sa abi eniye. A mholi isamhi abi egbhali ama a li abi emofe ni ẹa lese emhikhoghuo obode onobe iriele. ²¹ A keke oli shi Ebe-no-pfuase khi,

“Emue ọda mhi rọ ya

nu egbo eyemhe ngme.

Mhi ya ri uruli epfese ngme,

ama ini o tseku khi ighọ,

egbọ eyemhẹ ẹa ya
ri esọ shi mhẹ eke,
ighọ Onomhụẹ ọ ngme.”*

²² Itobọ ighọ, ẹmuẹ ọda, ọa khi emhi ọnyaloa shi eni e miesuọ ọ sẹ ọ ni eni ẹa miesuọ. Ama imekẹguele, eni miesuọ o mema gọ lu, ọa khi oyi eni ẹa miesuọ.

²³ Irarighọ, ini igbaa oyi eni e mie iJesu iKirisiti suọ kpa e legba ni ọgbọkpa ọ rọ ọ ngme ẹmuẹ ọdọda, eshẹbẹ ali eni ẹa miesuọ, ẹa ya liẹ khi ujili ọọ kpha ẹ nya? ²⁴ Ama ini ọgbọkpa ọọ mekẹguele, ni ẹgbọ ni ẹa miesuọ okekhi ọgbọ ni ọa lẹsẹ emini a riẹ ọ rọ lo le. Rọte ingmemhi ni ọọ suọ, ọ rọ ya lẹsẹ khi ọna olamhẹ lọli khi, ni ọ khi ọni ọ mu pfi.

²⁵ Osheli isamhi udu eyọli e ya khueghie-a gboo. Ọ de yeshi, ọọ ga Ẹshinegba, ọọ liẹ, “Ẹshinegba ọ la ẹ iteva egbẹgbọ.”

Ugamhi ni ọa mhụẹ ozughu

²⁶ Inyoghuo, abi mhi ri ona ngme khi, ini a lona kugbe shi ugamhi, ni ọghuo ọ rọ mhọli uwolo, okekhi khi ọghuo ọ mhọli emini ọ sẹsẹ, okekhi irokhase ọlese ọ mhọli, okekhi ẹmuẹ ọda ọlese ọọ ngme, okekhi aguele emini a ri oni ẹmuẹ olese ngme mhọli. A riẹ ẹnana nya rọ kpaghiẹ igbaa oyi eni e mie iJesu iKirisiti suọ obo. ²⁷ Ini ọgbọ ọ ya ngme ẹmuẹ ọda, ẹgbọ aava tse e lẹsẹ ngme, ini ẹ khi e bu dọsẹ, e khi aasẹ. Ama ọtuoghuo ọghuo ọ kpẹ ke ngme, ọgbọsẹ ọọ guele abi ọọ ngme. ²⁸ Ini o khia khi ọgbọ ọa la oni igba oyi eni e miesuọ ni ọ ya ke mie ọli emini ọọ ngme guele, ọni ọọ ngme ungmehi ẹmuẹ ọda ọghọ ọ khukhu unu, ọ lẹsẹ nu egbọli ali Ẹshinegba ke ngme.

* **14:21** Li zẹ Aza 28.11-12

²⁹ Emekeguele aava okekhi aase e doḅe ya ke ngme, eḅo enekpōle e ku esọ-a ni e leṣe abi eḅe ngme. ³⁰ O kha ke khia khi a ri irokhase khase oḅoḅese ni o shito oni ilegba, oni o kpē ngme egho, o mu migha. ³¹ Eḅe nya a doḅe ya meḅuele, ama o khi oṭuoghwo oghwo, ni enekpōle e wena ali ni a ri udu shi we o. ³² Eni e mhue ayemhe imeḅuele e ke ri eḅeḅe na egbe ro ngme ini ayemhe imeḅuele o la we egbe e gbe akanya. ³³ Irari khi Eshinegba o a khi ona ozughu, ama oyi opfomhe. Abi o li shi elemhi igba oyi eni miesuo nya.

³⁴ Ikpotoso e ke khukhu unu ini igbaa oyi eni e mie iJesu iKirisiti suo e legba, abi o li shi igbaa oyi eni e mie iJesu iKirisiti suo elese nya. A khi ze we ngme, e ri ochoghō ke deba omheṣe, abi ushi o ngme.† ³⁵ Ini e nono ni wewe e leṣe udi-ingme okhoghwo, e la apfe mhila edowe. Emhi omama o khi ni okpotoso o ro la ilegba igbaa oyi eni e mie iJesu iKirisiti suo ngme.

³⁶ Abi khi obō oye e ungememhi oyi Eshinegba o te gba ekele, abi khi eḅe ghwo o leṣe ramhi egbe? ³⁷ Ini oḅoḅokhoghwo o sa khi omekeguele loḷi khi, okekha khi eri o lie khi loḷi mholi ayemhe ni o pfuase, o mema ya leṣe khi emini mhi keke e ghi e ena khi ushi oyi Onomhue lo. ³⁸ Ama ini oḅoḅokhoghwo o ri eloe gbe ungememhi ona, a li ri eloe gbe oḷi.

³⁹ Irarigho, inyoghwo-mhe, a ke nono ni a meḅuele, ama emue oḅa ingmengme, o khi khi ighuighue. ⁴⁰ A ke rieḅe emhikpa te ode ni o a mhue ozughu.

† 14:34 Li ze Igbae 3.16

15

Irote eghuli guale oyi iKirisiti

¹ Mena mhia nono ni mhi yele ẹ le inyoghuo, ingme usomhi onete ni mhi ro tse abo ye ẹ ni a miesuo, ni irudunga oye ẹ o migha nga egbegbo.

² Oni usomhi onete ona a ro tsumhi ẹ, ini a da mu emini mhi ro tse abo ye ẹ mhue toto. Ini ọa khi igho, eri a miesuo shi afue.

³ Abi mhi li te eke mie oni usomhi ni o lolo mu ẹloe, igho mhi li gue ọli ye ẹ. Usomhi khi, iKirisiti ọ ghu-a

to olamhe eyawa

abi a li keke ọli

shi Ebe-no-pfuase.* ⁴ Khi a roli to,

a rote eghuli guise ọli le ẹle nuzi-ese,

abi Ebe-no-pfuase o ngme.†

⁵ Ọ ri egboi khasẹ iPita,

ọ tigbe ri egboi khasẹ eni ogbava.‡

⁶ Ọ tigbe ri egboi khasẹ,

egbo ni e miesuo ni e bu dose

egbo egbhue uye ali ishe (500),

ni e la asheghuo utoghuo,

ni o khia khi ebubu we

e kie la agbo,

eghuo ọ e she ghua.

⁷ Ọ tigbe ri egboi khasẹ iJemhisi,

neni ọ tigbe gbo

ri egboi khasẹ ighiusomhi na kee nya.

* **15:3** Li ze Aza 53.5-12 † **15:4** Li ze Iwolo 16.8-10; iMat 12.40; Ika 2.24-32 ‡ **15:5** Li ze iMat 28.16-17; iMak 16.14; iLuk 24.34,36; iJon 20.19

⁸ Ikpukhokho o, o li ri egboli khase mhe abi omo ni a bia shi eghenge ni aa kha bia li shi. ⁹ Irari khi mhemhe mhi ga kpoke na ighiusomhi na kee enekpole nya a. Mhi aa fe fu te ni a lu aghiusomhi na kee, itobo khi mhi mu okholi vule shi igbaa oyi eni e mie iJesu iKirisiti suo oyi Eshinegba o.* ¹⁰ Ama okhale ni mhia fute ni Eshinegba o li na mhe o remhe khi emini mhi khi. Ali khi okhale ni o li na mhe o a li opfu-a. Ini a ke gbo riele oli bino, mhi she ga roshaka gbe akanya dose we nya. Ama o a khi mhemhe mhi dobe gbe oli, ama okhale oyi Eshinegba ni o la mhe egbe a gbe akanya lo. ¹¹ Itobo igho, ini o khia khi wewe e tsabo oni usomhi, okekhi obo oyemhe o te bhale o, ungmemhi oghuo anye kie ga ro o tse abo, ni o khi emini a mie shi.

Iröte eghuli guale oyi eni eghua

¹² Usomhi oyanye na. A she röte eghuli guise iKirisiti le. Elo o ke ze khi eghuo e e ro lie khi iteghuli guale oyi eni e ghu-a o a la o sho? ¹³ Ini iröte eghuli guise eni e ghu-a le o a la o, ogho khi aa guise iKirisiti le. ¹⁴ Ini o khia khi aa röte eghuli guise iKirisiti le lo, itsabo oyawa, afue o kha khi, igho li khi irudunga oyawa. ¹⁵ O a khi igho tse, eni e pfi otsese kie egboli ma Eshinegba anye kha khi. Irari khi anye she kpe pfi otsese guele na Eshinegba khi o röte eghuli guise iKirisiti le. Ini o khia khi igesikia o kha khi lo khi aa ya guise eni e ghu-a le lo, eri o kha rokhase khi o a guise iKirisiti le. ¹⁶ Irari khi ini aa ya guise eni e ghu-a le, aa li guise iKirisiti le o li khi egho. ¹⁷ Ini o khia khi aa guise iKirisiti

§ 15:8 Li ze Ika 9.3-6 * 15:9 Li ze Ika 8.3

le, irudunga oyeḗ ọa kha mhuḗ emini o kha li na e. Eḗ a kha kiḗ la okhena ipfezomu shi olamhḗ eyḗḗ. ¹⁸ Ogho li khia khi, eni e ghuloa ni e mie iKirisiti suo khi eri e li li opfu-a. ¹⁹ Ini o khia khi agbo ana tse, irudushi ni awa mhuḗ na iKirisiti o pfo shi lo, awa a opfu o kha bie gbḗ nḗ nya.

²⁰ Egbegbi ingme ni o la o khi, a she roṭe eghuli guise iKirisiti le, ni o ri awa mie shi o khi a ya gbo guise eni e ghu-a le. ²¹ Irari khi abi eghuli o roṭe obo oyi oḡbo oṭuoghwo bhale ikhi Adamu, igho iroṭe eghuli guise le o li roṭe obo oyi oḡbo oṭuoghwo bhale ikhi iKirisiti. ²² Irari khi abi eḡbokpa e li roṭe obo oyi Adamu ghu-a, igho a li ya roṭe eghuli guise oḡbokpa le, roṭe obo oyi iKirisiti. ²³ Ama a ya guise oḡboḡbo le abi o li te oḗi, iKirisiti o khi oni odode, o kha nyene egbe bhale, a tigbe li guise eni e mie oli suo le. ²⁴ Ishegho ozukhomhi agbo o bhale, ini iKirisiti o mu ekpabo ayemhḗ nya o le, ali eni e mhuḗ afu ali itoto nya, o tigbe rue oni omhese nya na Eshinegba ita. ²⁵ Irari khi iKirisiti o ya ke mhese ramhi ni Eshinegba o ro ya ri ebe oḗi nya kpoke ekoawe eyoli.† ²⁶ Obe ni o ya kpukhokho mu o le khi, eghuli. ²⁷ Irari khi Ebe-no-pfuase o ngme oḗi khi “Eshinegba o ri emhikpa kpoke ekoawe eyoli.” Onana o roḗi khase gbo khi aa li ri Eshinegba ma o ro kpoke na iKirisiti, ikhi loḗi ni o ri emhikpa kpoke ekoawe eyi iKirisiti.‡ ²⁸ Itobo khi ini a da ri emhikpa shi omhese oyi iKirisiti se, eghēghē agho loḗi oyoḗi ni o khi omioḗi, o ri eḡboḗi kpoke na Eshinegba, oni o ri emhikpa kpoke na li. Eshinegba o mhese e shi emhi nya.

† 15:25 Li ze Iwolo 110.1 ‡ 15:27 Li ze Iwolo 8.6

29 Elo zẹ ni ẹgbọ e rọ ọ batazi na ẹgbọ ni e she ghu-a? Ini aa ya guise eni e ghua le, elo o zẹ ni a rọ batazi shi na wẹ? 30 Elo o zẹ ni anye rọ ri agbọ oyanye ẹ shi okhena ẹghẹghẹ kpa? 31 Anye ẹ la okhena eghuli ogbẹlẹkpa! Ititiegbe ni mhi ri itobọ oyẹ ẹ titi, irari emini iJesu iKirisiti oyawa ọ riẹle na ẹ, o rẹmhẹ ngme ona. 32 Elo a dabi khi o khi eleli oyemhẹ ni mhi rọ nu inyagbemhi ebe, ikhi emose egho na ẹoli Efesosi khọli? Ini aa ya guise eni e ghua le bhale agbọ,
Awa bie ke le awa a da,

irari khi awa ya ghu-a akọ. §

33 Khi zẹ ni a sẹsẹ wasẹ-a. “Ikugbe ẹgbọ ebe ọ, o ma yese egbegbi angeli-a.” 34 Nyene egbe bhale ẹgbhali eye, a tiegbe olamhẹ le. Eghuo ẹ e la ọ ni ẹa lẹsẹ Eshinẹgba. Ni o ri omama mu ẹ, mhi rọ ngme ona.

Idiegbe ni a rọte eghuli guise le

35 Ama ogbọ ọ dobe ya mhila ogbọ, “Sẹ a liẹ guise eni e ghu-a le bhale agbọ? Idiegbe onabi onoghuo e ke ya mhọli?” 36 Yeye oyẹghẹ! Waa lẹsẹ khi emini a rọ kọ ọa ya zẹ ini ọa li kpẹ ghua? 37 Ini a ri ukpamhi ọakpa kọ, ọa ke ẹ zẹ ukpamhi nge, ama ugheghẹ ọli o ke zẹ ngale. 38 Eshinẹgba ọ ri idiegbe ẹ na ikpamhi abi o ghọle ọli shi, ikpamhi emhi nya e mhọli idiegbe oyewe. 39 Idiegbe oyi emhi nya ẹa li abeghuo. Ẹgbọ e mhọli idiegbe oghuo, elamhakọ e mhọli idiegbe olese, ipfeli ali ifele e mhọli idiegbe eyewe. 40 Emhi ọdọda e la idane, emhi ọdọda e li la ekekhe. Otse oyi emhi na idane, o khi oghuo, otse ni o la emini e la ekekhe o khi ọda. 41 Ovọ o mhọli

otse oyọli ọda kẹ, uki o mhọli otse olese, ikpẹtata e mhọli otse olese ọda. Eni ikpẹtata e gbo somhotse doṣe egbe. ⁴² Igho o ya li ini a guise eni e ghu-a le. Idiegbe ni a ro to, eni e ke a e khi ni a ro to. Ama eri a guise ọli le ni ọa ke ya ke a ghue. ⁴³ Ini a roli to, o yemhi osue, ọa mhue itoto, ama ini a guise ọli le o somhotse-a, o mhue itoto. ⁴⁴ Ini a roli to, o khi idiegbe ni a me alo gbugbugbu. Ini a guise ọli le, o khi idiegbe ayemhe.

Ini idiegbe ni a me alo gbugbugbu o la o, idiegbe elemhi ayemhe o li la o. ⁴⁵ Abi a li keke ọli khi, “Omose onodode Adamu, eri a ma li ogbo ni o mhọli ayemhe.” Ama khi Adamu ni o kpe ukhokho, ayemhe ni o ri agbo a na ogbo o khi.* ⁴⁶ Oa khi idiegbe ayemhe o kpe bhale, ama oni a me alo gbugbugbu, neni a me oyi ayemhe. ⁴⁷ Adamu, omose onodode, itutu ena eke a ro ma li, Adamu onuzava iloghie o te tiemhile. ⁴⁸ Eni e khi eyi eke, eri e li abi eni a ri itutu eyi eke ma, eni e khi eyi iloghie eri e li abi eni e rote iloghie bhale. ⁴⁹ Ezeze abi awa li ri irokhokho oyi omose ni a ri eke ma so, igho awa gbo li ya ri irokhokho oyi omose ni o rote idane bhale so.

⁵⁰ Mhi gue ona ye e inyoghuo khi, emhi idiegbe ali emhi ọlia ea ya lo Eghiele oyi Eshinegba. U ke-liẹ khi eri idiegbe ni ọọ ke-a, o ke ya mhọli okemhi shi oni iloghie ni ọa ya ke a. ⁵¹ A ri esọ shi egbegbingme osheli ona. Awa nya awa aa ya ghua, ama ini akala ni o kpukhokho o de, a ya mu awa mela-a, bia, ⁵² elemhi ikoko alo khueghie-a, ini oni akala ni o kpukhokho o de. Irari khi akala o ya de, eni e ghu-

* **15:45** Li ze Igbae 2.7

a e ya ri idiegbe ni ọa ya kea guale, a ya mu we mela-a.† ⁵³ Irari khi idiegbe ni ọọ ke-a o mema ya ri idiegbe ni ọa ya ke so, oni ọọ ghu o ri idiegbe ni ọa ya ghu so. ⁵⁴ Ishegho, ini idiegbe ni ọọ ke-a o ri idiegbe ni ọa ya ke so se, ni idiegbe ni ọọ ghu o ro ri idiegbe ni ọa ya ghu so se, ungmehi ni ebe o ngme o bhale ya tse ni o li khi,

“A she to eghuli lue
elemhi imuole.”‡

⁵⁵ “Eghuli o, ighe imuole
ni u ke dobe ya mu o le mena?

Eghuli o! Ighe ekpabo eye mena?”§

⁵⁶ Olamhe o ri ekpabo na utamhi oyi eghuli e ta, ni o ro kuali utse, olamhe o rote ushi mholi ekpabo.

⁵⁷ Ama awa kphemhi na Eshinegba ni o ri imuole na awa rote obọ oyi iJesu iKirisiti Onomhue oyawa.

⁵⁸ Irarigho, inyoghuo a migha gbaa. A gbe akanya oyi Onomhue oyi e ke je odalo, abi a ro lese khi akanya ni u da gbe na Onomhue khi ọa khi afue.

16

Ukpaghọ ni a mie ghi igbaa oyi eni e mie iJesu iKirisiti suọ na iJerusalemu

¹ Ni mhi ro ngme nga ingme ikpaghọ ni a mie ni a ro ya kpaghie igbaa nya eyi eni e mie iJesu iKirisiti suọ ni e la eke iJudia obọ, ni a keke shi ebe ghi mhe. A ke li abi mhi gueye igbaa oyi eni e mie iJesu iKirisiti suọ ni e la eke iGalesha e li ke riye.*

² Uka khi uka kpa, a ke rote ikpaghọ ni a gbe, rue shi asheghuo abi ogbogbo o mhue, ini a khi gbo ke

† 15:52 Li ze 1 iTesa 4.15-17 ‡ 15:54 Li ze Aza 25.8 § 15:55 Li ze Osia 13.14 * 16:1 Li ze iRom 15.25-26

zela ikpagho elese ini mhi bhale. ³ Ini mhi bhale, mhi ya keke ebe na egbo ni a ze, mhi keke shi o khi wewe a ghie, e tsua isomhopfa eyee je iJerusalemu. ⁴ Ini o ke khia khi o ti ni mhi li ye, anye ga kia.

Omhesẹ ni iPolu o mhese

⁵ Mhi ya bhale ya me e ini mhi rote iMasidonia dose se.† ⁶ Mhi nu e ya la denẹ. Otse, mhi ga la agho okase nya. Eghẹghẹ agho a ke ri ukpagho kpaghie mhe obo je obiobini mhi ke ya je. ⁷ Mhi aa nono ni mhi me e eloe memena, mhi aa nono ni mhi lese te agho dose tse. Mhia nono ni mhi nu e shito tese ukuku o ini Eshinegba o lama. ⁸ Mhi ya la Efesosi ramhi ele ukpe iPetikositi,‡ ⁹ irari khi asha oniemi o khueghie-a na mhe shi ana ni mhi ro me asha gbe akanya Eshinegba. Ama khi eni e mu okhue vule shi mhe o e bu.§

¹⁰ Ini iTimoti o bhale, a lolo mu oli epfese, irari oni o gbe akanya na Eshinegba nabi mheme o li khi.* ¹¹ Ogbokhoghuo o khi ri eloe gbe oli, ama a kpaghie oli obo ni o ro dobe ti okiali eyoli je odalo shi opfome, ni o dobe bhale deba mhe. Mhia khe oli, ali inyoghuo enekpole.

¹² Ingme oyi Apolosi. Eri mhi ga lolo ye oli ude o ko ya feli e, loli ali inyoghuo enekpole. Ama o a ghole oli ni o ro ye memena, ama ini o mhue oni eghẹghẹ, o ya bhale.

¹³ A ke to eloe eke, a migha gbaa shi irudunga, a khi egbo ni e mholi aye, a khi eni e toto. ¹⁴ A ri inono ke gbe ikanya eye nya.

† 16:5 Li ze Ika 19.21 ‡ 16:8 Li ze iLev 23.15-21; iDeut 16.9-11

§ 16:9 Li ze Ika 19.8-10 * 16:10 Li ze 1 iKori 4.17

¹⁵ A lẹṣẹ khi iSitẹfanasi ali ọmhuẹ-apfẹ oyọlì nya, e kpe tododẹ khi eni e miesuọ shi obini eke Akhaya. E she ri egbewẹ na ugamhi oyi ẹgbọ ni a pfa na. Mhi lema ẹ,† ¹⁶ a ke nyẹṣẹ ukhomhi na omhẹṣẹ oyi ẹgbọ eghoḡho ali oḡboṣe ni e nu wẹ ẹ gbe ikanya eghoḡho.

¹⁷ Egbe e ma mu mhẹ shi ibhale oyi iSitẹfanasi ali iFotunatusi ali Akhaikusi irari wẹwẹ e ke to-ẹoli ẹ abi aa rọ la akaghọ. ¹⁸ Eri e ri egbe mu mhẹ e ti ayemhẹ oyemhẹ nga, abi e ri egbe mu ẹ. Ẹgbọ enana, e ti ni a tṣẹ, e mu akanya.

¹⁹ Igbaa nya eyi eni e mie iJesu iKirisiti suọ eni e la eke Esha ẹṣ tṣẹ ẹ. Akuila ali iPisilia ali igbaa oyi eni e mie iJesu iKirisiti suọ ni ẹ lona apfẹ oyewẹ, e li ẹ tṣẹ ẹ otṣẹ irudunga.‡ ²⁰ Inyoghuo nya ni e la ana ẹṣ tṣẹ ẹ. A ke tṣẹ egbe egbegbi otṣẹ a ghele mu egbe. ²¹ Mhẹmhẹ iPọlu mhi ga ri obọ ma ebe ona. ²² Oni ọa da nono ingme oyi Onomhuẹ ne, Eshinegba ọ ya pfa ẹzo mu ọlì. Mhi lema, Onomhuẹ ọ kele bhale. ²³ Okhale oyi iJesu Onomhuẹ o ke deba ẹ.

²⁴ Inono oyemhẹ o ka nu ẹ la nya ni a khi eyi iJesu iKirisiti. Atṣẹ.

† **16:15** Li zẹ 1 iKorì 1.16 ‡ **16:19** Li zẹ Ika 18.2

Ebe-No-Pfuasę Ishobo Onogbo
New Testament in Ivbie North-Okpela-Arhe
(NI:atg:Ivbie North-Okpela-Arhe)

copyright © 2012 Wycliffe Bible Translators, Inc.

Language: Ivbie North-Okpela-Arhe

Translation by: Wycliffe Bible Translators, Inc.

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789789194797

The New Testament

in Ivbie North-Okpela-Arhe

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

PDF generated using Haiola and XeLaTeX on 21 Feb 2024 from source files
dated 29 Jan 2022

03be06b0-68fd-500b-b9a9-6bca4b63979a